

DIDZA' ZÍ'ALÖ GUSÖL-LË'Ë PABLO YÖDZÖ CORINTO

Pablo rugapë' Dios bönachi queë' Cristo nacu'ë Corinto

1 ¹ Ca ré'ëni quézinë' Dios bulidzë' neda', Pablo, para gaca' gubáz queë' Jesucristo. Böchi'ru' Sóstenes runë' neda' tsözxón.
² Rugapa' Dios libí'ili', böchi' luzá'ado', rudúbili' queë' Dios lu yödzo Corinto, en nácali' quez queë' Dios tu' nácali' tuz len Jesucristo. Dios caz bulidzë' libí'ili' para guéquili' quez queë' tsözxón len yúgu'të nupa nacuá' yúgu'të lataj, en tu'lidzë' Dios, tu'gunë' dxin La la'ayi queë' Xanru' Jesucristo, Xángaquië', enca' Xanru'. ³ Ráta'yua' lahuë' Xúziru' Dios, en lahuë' Xanru' Jesucristo uzá' ládxë'ë queéli', en gunë' ga soa dxi icja ládxi'do'oli'.

Yugu' le ruzí'iru' xibé tu' néquiru' queë' Cristo

⁴ Rética'sa'-në' Dios: “Xclenu’” ca naca queéli', tu' zoa le buzá' ládxë'ë Dios queéli' tu' nácali' tuz len Jesucristo. ⁵ Tu' nácali' tuz len Cristo, Dios chinagú'udë'ë xinózili' yúgu'të le nequi queë'. Rácalenë' libí'ili' ca naca yúgu'të didza' ruí'ili', en runë' ga réajni'ili' yúgu'të. ⁶ Caní naca, tu' guzxí' lu ná'ali' idú ládxi'li' le runtu' liná' lo ca naca queë' Cristo. ⁷ Que lë ni na', biti' bi riyadzaj queéli' que le runnë' Dios Bö' Lá'ayi queéru', tsanni ni ribózáli' dza na' ilá' lahuë' Xanru' Jesucristo. ⁸ Lë cazë' utipë' ládxi'li' para gaca guá' ilenli' yúgu'të ga idxintë dza údxi, para cabí gaca nu bi inné queéli' dza ni' huödë' Xanru' Jesucristo. ⁹ Dios runë' ca rnnë', en Lë cazë' bulidzë' libí'ili' para gácali' tuz len Zxí'inë', Xanru' Jesucristo.

Narúajgaca choplö bönachi queë' Cristo nacu'ë Corinto

¹⁰ Ni'a queë' Xanru' Jesucristo ráta'yua' loli', böchi' luzá'ado', guli'gún tuz xtídza'li' yúgu'tëli'. Biti' irúajli' choplö, pero guli'gaca tuz ca rizá' ládxi'li', en ca runi libí'ili'. ¹¹ Caní rea' libí'ili', böchi' luzá'ado', tu' gula'guíxjöi'inë' neda' bönni' nacu'ë lídxinu Cloé ca runli', ta'nné' ridil-la dídza'li'. ¹² Lë ni rnnía': Nadzá'lö didza' ruí'ili' tu tuli'. Bál-lali' rnnali' dá'ali' Pablo. Ia'bál-lali' rnnali' dá'ali' Apolos. Ia'bál-lali' rnnali' dá'ali' Cefas, ate' ia'bál-lali' rnnali' dá'ali' Cristo. ¹³ ¿Naru' birúajtsë' choplö Cristo? ¿Naru' gudá'atsa' neda', Pablo, lë'e yaga cruz uláz queéli'? ¿Naru' bidíłatsali' nisa para gácali' tuz len neda'? ¹⁴ Rea'-në' Dios: “Xclenu’”, tu' cabí buquila' nisa niturö libí'ili', pero chópasë' Crispo, en Gayo. ¹⁵ Que lë ni na' biti' gaca innali' bidíłali' nisa para gácali' tuz len neda'. ¹⁶ Lësca' buquila' nisa Estéfanos, en nupa nacuá' lidxë'. Biti' röjneda' channö buquila' nisa nu yúbölö. ¹⁷ Gusöl-lë'ë Cristo neda', calëga para uquila' bönachi nisa, pero para guna' libán que didza' dxi'a.

Ru'a didza', calëga lu yöl-la' rácada' que caza', para cabí ucácha'a yöl-la' huáca que le benë' Cristo lë'e yaga cruz.

Cristo napa cazë' yöl-la' huáca, en yöl-la' réajni'i queë' Dios

¹⁸ Nupa nádagaca chul-la niti téquiguequi cá'asö naca libán runru' ca naca queë' Jesús, ca na' gútië' lë'e yaga cruz, pero rë'u na' nuláru', réquibe'eru' dzaga le yöl-la' huáca queë' Dios le rusölá rë'u. ¹⁹ Caní naca, tu' nazúaj lu guichi lá'ayi le rnna:

Guna' ga huóaca nítisö yöl-la' rácada'
quégaca nupa taca yenni'.

Tsölá'alö ucá'ana' yöl-la' réajni'i
quégaca nupa ta'yéajni'i yenni'.

²⁰ ¿Bizxi caz uzi'tsë' xibé bönni' réajni'inë' yenni'? ¿Bizxi caz uzi'tsë' xibé bönni' nabé'ede'enë' ru'ë didza'? Dios chibenë' ga böaca cá'asö yöl-la' réajni'i quégaca bönachi yödzölió ni. ²¹ Dios, lu yöl-la' réajni'i queë', biti' bë'ë lataj ilúnbe'e bönachi yödzölió ni Lë' ni'a que yöl-la' rácada' quégaquië'. Dios guyaza ládxë'ë busölë' nupa ta'yéajlë' Lë' ni'a que libán na' runru', sal-la' téquiguequi bönachi cá'asö naca.

²² Té'ënnë' yugu' bönni' judío ila'lé'enë' yöl-la' huáca nádagaca bë', ate' bönni' zi'tu' ta'guiljë' yöl-la' réajni'i. ²³ Rë'u ni runru' libán queë' Cristo, ca na' gútië' lë'e yaga cruz. Le nácatë, libán runru' ca gútië' Cristo, run ga ta'chixi ta'nigui bönachi judío, ate' ia'zica'rö bönachi téquiguequi cá'asö naca. ²⁴ Bönni' na' bulidzë' Dios légaquië', sal-la' nádagachi bönni' judío o bönni' zi'tu', téquibe'enë' napa cazë' Cristo yöl-la' huáca queë' Dios, en yöl-la' réajni'i queë' Dios. ²⁵ Téquiguequi bönachi yödzölió ni le benë' Dios naca bë' biti' bi nózinë', pero lë na' benë' náparö yöl-la' réajni'i ca yöl-la' réajni'i quégaca bönachi. Téquiguequi le benë' Dios naca bë' nacuídi'në', pero lë na' benë' náparö yöl-la' huáca ca yöl-la' huáca quégaca bönachi. ²⁶ Na'a, böchi' luzá'ado', guli'tsöjné ca gúcali' cate' bulidzë' Dios libí'ili'. Biti' gula'cu'ë ládjali' zían bönni' ta'yéajni'inë' lu yöl-la' bönáchisö quégaquië', en biti' gula'cu'ë ládjali' zían bönni' unná bë', en calëga zían bönni' nádagachi lo. ²⁷ Téquiguequi bönachi yödzölió ni yugu' bönni' na' guröë' Dios biti' bi nózguequinë'. Caní benë' Dios para gunë' ga ulu'tuí'i nupa ta'yéajni'i. Lësca' caní guröë' Dios nupa nacuídi'gaca yödzölió ni para gunë' ga ulu'tuí'i nupa nál-lagaca. ²⁸ Lësca' caní, téquiguequi bönachi yödzölió ni nupa na' guröë' Dios nádagaca cá'asö, en biti' bi nádagaca, en nacuídi'gaca. Caní benë' Dios para gunë' ga ulu'gá'ana cá'asö lë na' tun zxön bönachi yödzölió ni. ²⁹ Que lë ni na', cuntu nu gaca gun ba zxön cuini lahuë' Dios. ³⁰ Dios caz benë' ga nácaru' tuz len Jesucristo, en benë' ga náparu' yöl-la' réajni'i queë' Cristo. Tu' náquië' Cristo tuz len rë'u, nuhuóácaru' tsahui', en néquiru' quez queë' Dios, en nuláru'.

³¹ Naca ca na' nazúaj lu guichi lá'ayi, le rnna: "Channö zoa nu bi ré'ëni gun zxön, ral-la' gun zxön Xanru'."

Libán runru' queë' Cristo, ca gudé'ë lë'e yaga cruz

2 ¹ Caní guca, böchi' luzá'ado', cate' bidxina' queéli'. Bena' libán loli' que xtídzë'ë Dios, calëga len yöl-la' réajni'i quia', en biti' bë'a didza' lu yöl-la' rácada' quia'. ² Cate' ni' guzóalena' libí'ili', bë' ládxa'a cabí gu'a didza' que le yúbölö, pero ca nácatë queë' Jesucristo bë'a didza', ca na' gudé'ë lë'e yaga cruz. ³ Guzóalena' libí'ili' lu yöl-la' ricuidi' quia', ate' lu yöl-la' radxi quia' guzxízida'a. ⁴ Bë'lëna' libí'ili' didza', en bena' libán que xtídzë'ë Dios, calëga ca tuí'i didza' bönachi lu yöl-la' rácada' quéguequisö, pero guzóalenë' Dios Bö' Lá'ayi neda', ate' guzóalen yöl-la' huáca queë' Dios neda', le guca bë' naca idútë li didza' bë'a. ⁵ Caní bena' para gaca tséajlë'ëli' Dios, calëga tu' biyónili' yöl-la' rácada' quégaca bönachi, pero tu' bilé'eli' yöl-la' huáca queë' cazë' Dios.

Dios Bö' Lá'ayi runë' ga núnbë'ëru'-në' Dios

⁶ Ruí'itu' didza' lu yöl-la' rácada' lógaca nupa chinácarö idú ca ta'yéajlë' Dios. Yöl-la' rácada' ni biti' naca ca le nápagaca bönachi yödzölió ni, en biti' naca ca le nápagaquië' bönni' ta'nná bë'ë dza ni zóaru' na'a, nupa na' ta'niti caz. ⁷ Ruí'itu' didza' que yöl-la' rácada' nagachi', lë na' runödzjë' Dios, tu' bigachi' yöl-la' rácada' na' buzóë' Dios dza ni'te para uzí'iru' xibé. ⁸ Yugu' bönni' ta'nná bë'ë dza ni zóaru' na'a biti' gulúnbë'ë yöl-la' rácada' na'. La'tu' gulúnbë'ë le, biti' ulu'dé'ë Xanru' nayépisëtërë' lë'e yaga cruz. ⁹ Naca ca na' nazúaj lu guichi lá'ayi le rnna:

Chinupé'ë Dios le ulu'zí' xibé nupa nadxí'iguequi Lë',
yugu' le cuntu nu ble'e, en biti' biyóni,
en biti' gula'zá' ládxi'gaca bönachi ca naca que.

¹⁰ Na'a, Dios nuzéajni'inë' rë'u yugu' lë ni lu në'ë Dios Bö' Lá'ayi, tu' ruyú cazë' Dios Bö' Lá'ayi yúgu'të, enca' le yu'u icja ládxi'da'ahuë' Dios caz.

¹¹ ¿Naru' gaca inózinë' nu bönni' le yu'u icja ládxi'da'ahuë' ia'tué' bönni'? Tuz bö' naca cazë' bönni' na' nözi lë na'. Lësca' caní, cuntu nu nözi le yu'u icja ládxi'da'ahuë' Dios. Tuzë' Dios Bö' Lá'ayi nózinë' lë ni.

¹² Rë'u ni, biti' nazí' lu ná'aru' tu bö' ridasö yödzölió ni, pero nazí' lu ná'aru' Dios Bö' Lá'ayi, Nu na' ruchízië' Dios rë'u para gaca gúnbë'ëru' yugu' le buzá' ládxi'ë Dios queëru'. ¹³ Yugu' lë na' buzá' ládxi'ë Dios queëru' ruí'iru' didza' que, calëga len didza' tu'sédinë' bönachi rë'u len yöl-la' rácada' quéguequi, pero len yugu' didza' rusédinë' Dios Bö' Lá'ayi rë'u. Caní naca, ruzéajni'iru' bönachi zóalenë' Dios Bö' Lá'ayi légaquië' ca naca le rusédinë' Dios Bö' Lá'ayi rë'u.

¹⁴ Tu bönni' biti' zóalenë' Dios Bö' Lá'ayi lë' biti' rizí' lu në'ë le rusédinë' Dios Bö' Lá'ayi rë'u, tu' réquinë' cá'asö naca. Biti' gaca tséajni'inë' bönni' na' lë ni, tu' gaca guéquibe'enë' tuzë' bönni' zóalenë' Dios Bö' Lá'ayi lë' le nazaca' lë ni. ¹⁵ Tu bönni' zóalenë' Dios Bö' Lá'ayi lë' gaca guéquibe'enë' le nazaca' yúgu'të, pero cuntú nu gaca guéquibe'e le nazaca' cazë' bönni' na'. ¹⁶ Nazúaj lu guichi lá'ayi le rnna:

¿Nuzxi caz nözi le rizá' ládxë'ë Xanru'?

¿Nuzxi caz gaca uzéajni'i Lë'?

Le rizá' ládxë'ë Cristo yu'u icja ládxi'do'oru' rë'u.

Nácaru' huen dxin tsözxón len Dios

3 ¹ Que lë ni na', böchi' luzá'ado', biti' guca güí'ilena' libí'ili' didza' ca ruí'ilena'-në' didza' tu bönni' nudödi cuinë' lu në'ë Dios Bö' Lá'ayi, pero bé'lena' libí'ili' didza' ca ruí'ilena' nu naca bönáchisö didza', biti' zóalenë' Dios Bö' Lá'ayi nu na'. Nácali' ca yugu' bi'i hué'ëni. Biti' nácali' tsutsu ca réajlë'ëli'-në' Cristo. ² Busédida' libí'ili' le cabí naca böniga, lë na' guca ca nidxi' güí'ili'. Biti' busédida' libí'ili' le naca böniga ca bëla' gáguli'. Biti' guca tséajni'ili' le naca ca bëla' gáguli', en biti' rácali' na'a. ³ Caní naca, tu' nácali' ca nu naca bönáchisö ga ridxintë na'a dza. Tsanni ni ruzxé'eli' luzá'ali', en ridil-la dídza'li', en rirúajli' choplö, nácali' ca nu naca bönáchisö, en runli' tuz ca tun bönachi yödzölió ni. ⁴ Cate' zóalen libí'ili' nu rnna da' Pablo nu na', en ia'tú nu rnna da' Apolos, nácali' ca nu naca bönáchisö.

⁵ ¿Nuzxi caz naca' neda', Pablo? ¿Nuzxi caz na' Apolos? Nácatu' huen dxin queë' Dios, ate' ni'a que le bentu' guyéajlë'ëli' Cristo. Tu tutu' runtu' dxin na' bennë' Xanru' que queétu'. ⁶ Dxin bentu' lu icja ládxi'do'oli' naca ca dxin run nu raza ruzóa. Neda' guza' xisedo', ate' Apolos gulu'ë nisa, pero Dios benë' ga gulén, en guzxón xisedo' na' nadúz icja ládxi'do'oli'. ⁷ Caní naca, láti'do'os nazáquië' bönni' guz, en láti'do'os ca' bönni' rigu'ë nisa, pero nazáca'dë'ë Dios Nu run ga rilén, en rizxón xisedo' na'. ⁸ Tuz ca nácagaquië' bönni' razë', en bönni' rigu'ë nisa. Dios ubil'ë que queégaquië' tsca naca dxin runë' tu tuë'. ⁹ Nácatu' huen dxin tsözxón len Dios, ate' libí'ili' nácali' ca la' yëla queë' Dios ga runtu' dxin.

Lësca' caní nácali' ca tu yu'u runë' Dios. ¹⁰ Ca naca le buzá' ládxë'ë Dios quia', naca' ca tu bönni' huen zö'ö lo. Neda' gulu'a xilibi zö'ö, ate' nu yúbölö richisa zö'ö na'. Tu turu' ral-la' uyuru' ca richísaru' zö'ö lahui xilibi zö'ö na'. ¹¹ Dios chigulu'ë tu xilibi zö'ö le naca Lë cazë' Jesucristo, ate' cuntú nu gaca cu'u ia'tú xilibi zö'ö caní. ¹² Dxin runru' queë' Cristo naca ca richísaru' zö'ö lahui xilibi zö'ö na'. Lahui xilibi zö'ö na' gaca nu gun dxin le naca ca richisa zö'ö le naca ca le néquini oro, o plata, o guió'j nazáca'da'gaca, o gaca nu gun dxin le naca ca richisa zö'ö le néquini yaga, o guizxi, o guixi' cá'asö. ¹³ Gaca bë' ca naca dxin núngaca

tu tu bönachi. Cate' idxín dza ichúguië' Dios quégaca bönachi, ilá' lahui dxin nunru', tu' tödi dxin na' lu guí', ate' guí' na' si' bë' dxin núngaca tu tu bönachi. ¹⁴ Channö dxin nunë' tu bönni' urúaj dxi'a lu guí' na', le naca ca tu zö'ö guchisë', Dios ubi'ë queë' ca sa'yéaj dxin nunë'.

¹⁵ Channö tseui dxin nunë' tu bönni' le naca ca tu zö'ö guchisë', unítië' le ré'ënë' ubi'ë Dios queë', pero ulá cazë' lë', ate' gaca queë' ca raca que nu rulá tu lu guí'.

¹⁶ ¿Naru' cabí nózili' naca cázali' yudo' queë' Dios, ate' zoë' Dios Bö' Lá'ayi icja ládxi'do'oli'? ¹⁷ Channö nu usuniti yudo' queë' Dios, Dios usunítië' nu na', tu' naca lá'ayi yudo' queë' Dios, ate' libí'ili' naca cázali' yudo' na'.

¹⁸ Biti' si' ye'e cuinli'. Channö réqui nu nutsa' ladjali' rácada' ca tácada' bönachi yödzölió ni, ral-la' huöáca nu na' ca tu bönni' biti' bi nózinë', para gata' que yöl-la' rácada' le naca idú. ¹⁹ Nu bönni' napzë' yöl-la' rácada' que yödzölió ni náquië' tu bönni' biti' bi nózinë' lahuë' Dios. Nazúaj lu guichi lá'ayi le rnna: "Dios runë' ga ila'chixi ila'nigui nupa tácada', rugunë' dxin yöl-la' rácada' quéguequi." ²⁰ Lësca' caní rnna: "Xanru' nózinë' nítisö naca le ta'bequi ícjagaca bönachi tácada'."

²¹ Que lë ni na', biti' ral-la' gunli' zxön le gaca gunë' tu bönni'. Nequi queéli' yúgu'të. ²² Néquiquequi queéli':

Pablo, en Apolos, en Cefas,
 en yödzölió ni,
 en yöl-la' na'bán, en yöl-la' guti,
 en dza ni zóaru' na'a, en dza si' za'.
 Yúgu'të nequi queéli',
²³ ate' libí'ili' néquili' queë' Cristo,
 ate' Cristo néquinë' queë' Dios.

Dxin tunë' bönni' gubáz nasól-lë'ë Cristo

4 ¹ Que lë ni na', ral-la' guéquili' nácatu' netu' huen dxin queë' Cristo, en nazí' lu na'tu' le nagachi' queë' Dios. ² Yugu' bönni', Dios nudödë' lu ná'agaquië' ulu'gunë' dxin le nequi queë', run bayudxi ilunë' idú dxi'a le tunë'. ³ Biti' bi ruí'i ládxa'a channö uchi'a usöröli' neda', o channö ulu'chi'a ulu'söró bönachi yödzölió ni neda'. Biti' ca' ruchí'a rusöró cuina'. ⁴ Biti' ruxós ládxi'da'ahua' neda'. Lë ni biti' naca bë' biti' nabága'a xíguia'. Xanru' náquië' Nu ruchí'a rusöróë' neda'. ⁵ Que lë ni na', biti' ral-la' uchi'a usöröli' nu bönni' zí'alö ca idxín dza que. Guli'cóz dza ni' huödë' Xanru', ate' Lë' ubéajë' ga liná' le nagachi' ga chul-la, en ulu'ë lahui le yu'u icja ládxi'do'gaca yúgu'të bönachi. Ní'irö Dios ubi'ë que quégaca bönachi le gun bal léguequi ca ral-la' gaca quéguequi.

⁶ Na'a, böchi' luzá'ado', ca naca lë ni, bë'a didza' que le runtu' netu', Apolos, en neda'. Huáca usédali' ca runtu' netu' para gunli' le nazúajsö

lu guichi lá'ayi, en biti' gunli' zxön tuë' bönni', en biti' uzóali' tsölá'alö ia'túë'. ⁷ ¿Nuzxi bentsö ga nacu' li' lo? ¿Bizxi caz bidéli'nu' li' le cabí bennë' Dios quiu'? Channö Lë' bénnasë' quiu' lë na' dë lu no'o, ¿bizx que run ba zxön cuinu', réquinu' rácasö quiu' bidéli'nu' lë na'?

⁸ ¿Naru' réquitseli' nadéli'tëröli'? ¿Naru' réquitseli' rilé'eli' yöl-la' tsahui' queéli'? ¿Naru' réquitseli' rinná bé'ëli', sal-la' biti' rinná bé'ëtu' netu'? Ni'a queë' Xanru' Dios ré'ënda' inná bé'ëli' para gaca inná bé'lentu' libí'ili' tsözxön. ⁹ Runi neda' naca queëtu', bönni' gubáz queë' Dios, ca nuzóë' netu' zéajtu' xibánitë ca na' raca quégaquië' bönni' chinarugu quégaquië' ilátië' lahui' lógaca bönachi. Nácatu' ca tu le tu'yuda' bönachi yödzölió ni, enca' ca tu le tu'yúdë'ë gubáz lá'ayi queë' Dios. ¹⁰ Tu' ré'ënitu' guntu' xichinë' Cristo, ruí'itu' bönachi lataj téquiguequi nácatu' bönni' biti' bi nózquequinë', pero libí'ili' réquili' rácada'ali' tu' nácali' queë' Cristo.

Libí'ili' réquili' chinál-lali',

pero téquiguequi bönachi nacuídi'tu' netu'.

Tu'zóa bönachi netu' tsölá'alö,

pero tun libí'ili' bal.

¹¹ Ga ridxintë na'a dza, riduntu', en ribídxitu' nisa.

Biti' dë lari' gácutu'.

Tun bönachi netu' zi', en biti' zoa lídxitu'.

¹² Rusaca' zi' cuintu', la' nétu'sö runtu' dxin.

Tu'lidza bönachi netu' zi',

pero netu' rinábatu' le gácalen léguequi.

Ta'bía ládxi'gaca bönachi netu',

pero ruá' rilentu' le.

¹³ Ta'nnë' queëtu',

pero lu yöl-la' nōxaj ladxi' ruí'ilentu' légaquië' didza'.

Ga ridxintë na'a dza nácatu' ca bëbu que yödzölió ni,

en ca tu le ta'ru'una yúgu'të bönachi.

¹⁴ Ruzúaja' queéli' caní lu guichi, calëga tu' ré'ënda' guna' ga utuí'ili', pero ré'ënda' uzéajni'ida' libí'ili', runa' ca runë' tu bönni' ruzéajni'inë' yugu' xzí'ini cazë' tu' nadxí'inë' légacabi'. ¹⁵ Sal-la' gaca zían gáyu'ë bönni' ila'cuá'alén libí'ili', en ulu'sédinë' libí'ili' ca naca queë' Cristo, tuz nu zoa naca ca xúzili', nu na' ben ga néquili' queë' Cristo. Lu yöl-la' na'bán cubi le nápalí' tu' dzágali' Cristo, neda' caz naca' ca xúzili' tu' busiyönda' libí'ili' didza' dxi'a. ¹⁶ Que lë ni na', ráta'yua' loli' güí'i ládxi'li' gunli' ca runa' neda'.

¹⁷ Que lë ni na' ca' risól-la'a-bi' bi'i Timoteo ga zóali'. Tu' rúnlenbi' neda' dxin queë' Xanru' nácabi' ca xzí'ini caza', en nácabi' idú ladxi', ate' nadxí'ida'-bi'. Gunbi' Timoteo ga tsöjnéli' yugu' xibá rusédida' tu' néquida' queë' Cristo, yugu' le rusédida' yúgu'të lataj lógaca yúgu'të cö' bönachi queë' Cristo. ¹⁸ Bál-lali' run ba zxön cuinli' tu' réquili' bíti'rö

udxina' ga zóali'. ¹⁹ Na'a, la' udxíntea' ga zóali' channö Xanru' gunnë' neda' lataj. Ní'irö guéquibe'eda', calégasö didza' tu'ë bönni' tun ba zxön cuíngaquië', pero guéquibe'eda' channö zóalen yöl-la' huáca queë' Dios légaquië'. ²⁰ Channö nazí' lu ná'ali' rinná bé'enë' Dios libí'ili', biti' naca bë' naca caní tu' rnnásili' ca'. Naca bë' naca caní channö zóalen libí'ili' yöl-la' huáca queë' Dios. ²¹ ¿Bízxilö ré'enili'? ¿Naru' ré'enili' udxina' ga zóali' len gubá'ayi, para guna' libí'ili' zi', o len yöl-la' nadxí'i, en lu yöl-la' nöxaj ladxi'?

Pablo ruchí'a rusöröë' tuë' bönni' runë' le ruá' dö'

5 ¹ Rizé didza' zóalenë' libí'ili' tuë' bönni' runë' le ruá' dö', tu' zóalenë' nigula queë' xuzë'. Le ruá' dö' caní biti' ca' tun bönachi biti' núnbë'gaca Dios. ² Libí'ili' run ba zxön cuinli', pero ral-la' huí'inili', en ubéajli' nu na' run dul-la' na' ga zóali'. ³ Sal-la' biti' zóalena' libí'ili' lu idútë le naca', le nácatë zóalena' libí'ili' lu bö' naca caza'. Ca chizóalen caza' libí'ili' chibuchí'a busöró'a' nu na' run dul-la' na'. ⁴ Cate' udúbili' queë' Xanru' Jesucristo guna' libí'ili' tsözxón lu bö' naca caza'. Ní'irö, len yöl-la' huáca queë' Xanru' Jesús ⁵ buli'dödë' bönni' na' lu na' Satanás tu' xihui' para initi idútë le naca cazë', pero ulá bö' naca cazë' dza ni' huödë' Xanru'.

⁶ Biti' naca dxi'a gun ba zxön cuinli' ca naca le runli'. ¿Naru' cabí nózili' didza' na' rnna: “Cua zído'os que yöta xtila gun ga chazxaj idútë cúa nazí'i le”? ⁷ Na'a, guli'cúa ga zóali' dul-la' na' le naca ca tu cúa zi gulás, para gácali' dxi'a. Ní'irö gácali' ca tu cúa cubi le cabí nazí'i cúa zi que, ca na' le nácatë chinácali'. Naca queëru' ca chizóaru' Laní Pascua cate' tahuë' yöta xtila biti' nazí' cúa zi que, en chigulútië'-ba' uláz queëru' bö'cu' zxila' que Laní Pascua na', bö'cu' zxila' na' náquië' Lë cazë' Cristo. ⁸ Que lë ni na' ral-la' gunru' laní na', calëga zóalen rë'u cúa zi gulás na' le ruluí'i le ruá' dö', en le cabí nazaca', pero ral-la' ugunru' dxin yöta xtila na' biti' nazí'i cúa zi que, yöta xtila na' ruluí'i le naca idú dxi'a, en le naca idútë li.

⁹ Cate' buzúaja' queéli' lu guichi zí'alö, gudxi caza' libí'ili' biti' gunli' tsözxón bönni' tunë' le ruá' dö'. ¹⁰ Gudxa' libí'ili' caní, calëga para ucuítali' tsaz ga nacuá' bönachi yödzölió ni, nupa tun le ruá' dö', en ga nacuá' bönachi ta'zé ládxi'gaca le dë que luzé'eguequi, en ga nacu'ë yugu' bönni' gubán, en bönachi ta'yéaj ládxi'gaca budó' guiój budó' yaga. Para gunli' caní gun bayudxi irúajli' yödzölió ni. ¹¹ Le ré'ëni inná didza' na' buzúaja' queéli' zí'alö naca para cabí gunli' tu zxön tuë' bönni' rnnë' néquinë' queë' Cristo, pero runë' dul-la' le lë'e, o rizé ládxi'ë le dë que luzé'ë, o reaj ládxi'ë tu budó' néquini, o rinné xihuë'ë, o rizúdxinë', o ribanë'. Biti' ca' gágulenli' tsözxón tuë' bönni' caní.

^{12,13} Biti' nequi quia' neda' uchi'a usöró'a' nupa biti' nabábagaca rë'u.

Dios uchi'a usöröë' léguequi. Libí'i cázali' ral-la' uchi'a usöröli' nupa nabábagaca libí'ili'. Que læ ni na', guli'cúë' ga zóali' bönni' xihui' na'.

Biti' ral-la' iché'ëru' böchi' luzá'aru' lógaca bönachi yúlahui'

6 ¹ Cate' ridil-la dídza'li' tuli' len ia'tuli', ñnacxi caz rurúguili' tséajli' yúlahui' ga ulu'chi'a ulu'söró nupa biti' ta'yéajlë' Cristo libí'ili'? Dxí'arö tséajli' lógaca bönachi queë' Cristo para ulu'chi'a ulu'söró libí'ili'. ² ñNaru' cabí nózili' nupa néquiguequi queë' Cristo ral-la' ulu'chi'a ulu'söró yúgu'të bönachi yödzölió? Channö libí'i cázali' uchi'a usöröli' bönachi yödzölió, ñnaru' cabí nápalí' yöl-la' réajni'i uchi'a usöröli' didza' bizxaj caní? ³ ñNaru' cabí nózili' ral-la' uchi'a usöröru' yugu' gubáz lá'ayi? Rúntërö bayudxi uchi'a usöröru' le taca yödzölió ga ni zóaru' na'a. ⁴ Na'a, channö raca tu le run bayudxi nu uchi'a usöró, læ na' raca yödzölió ni, ñbizx que rucuá'ali' nupa ulu'chi'a ulu'söró le, nupa na' biti' bi dë lu nê'eguequi ládjagaca bönachi queë' Cristo? ⁵ Rnnía' caní para guna' ga utuí'ili'. ñNaru' cabí zóalen libí'ili' nu raca lati' nu gaca uchi'a usöró le raca quégaquië' böchi' luzá'ali'? ⁶ ñNacxi caz gaca tu bönni' réajlë'ë Cristo iché'ë böchi' luzé'ë yúlahui' ga ulu'chi'a ulu'söró bönachi biti' ta'yéajlë' Cristo légaquië'? ⁷ Le nácatë richixi riníguili' tu' ridil-la dídza'li'. ñBizx que biti' guá' ilenli' nu ruá' dö' queé'li'? ñBizx que biti' guá' ilenli' nu rucáchi'lan le dë queé'li'? ⁸ Libí'ili' ruá'ali' dö', en rucachi' lanli', ate' runli' caní quégaquië' böchi' luzá'ali' ta'yéajlë'ë Cristo.

^{9,10} ñNaru' cabí nózili' biti' ila'yaza bönachi biti' nácagaca tsahui' ga rinná bë'ë Dios? iBiti' si' ye'e cuinli'!

Biti' ca' tsaz ga rinná bë'ë Dios nu run le ruá' dö':
Cuntu nu reaj ladxi' budó' guió' budó' yaga,
en cuntu nu riguitsaj xibá que yöl-la' nutsaga na',
en cuntu nu bönni' run cuinë' ca nigula,
en cuntu nu bönni' zóalenë' la' luzé'e bönni'së',
en cuntu nu bönni' gubán, en cuntu nu ruhuidi',
en cuntu nu rizudxi, en cuntu nu rinné xihui',
en cuntu nu rucáchi'lan.

Biti' ca' tsaz nu run caní ga rinná bë'ë Dios.

¹¹ Caní gúcali' bál-lali' libí'ili', pero na'a chinuhuöácali' dxi'a que dul-la' gubága'li', en chinéquili' quez queë' Dios, en chinuhuöácali' tsahui' ni'a que le benë' Xanru' Jesús. Bö' Lá'ayi queë' Dios runë' ga raca caní.

Idútë le naca cázaru' nequi quez queë' Dios

¹² Ta'nná bönachi: “Yúgu'të dë lataj gunru'.” Sal-la' nácatë didza' ni, biti' ral-la' gunru' yúgu'të. Sal-la' dë lataj guna' yúgu'të, biti' gu'a lataj bi inná be'e neda'. ¹³ Ta'nná ca' bönachi: “La' huagu naca le tsaz lé'ëru', ate' lé'ëru' naca ga tsudzu la' huagu.” Nácatë didza' ni, pero idxín dza

usunítië' Dios la' huagu, enca' lé'ëru'. Dios benë' idútë le naca cázaru', calëga para ugunru' le dxin gunru' le ruá' dö'. Naca para uzi'ë xibé Xanru', ate' Xanru' náquië' para uzí' xibé' idútë le naca cázaru'. ¹⁴ Dios busubanë' Xanru' Cristo lu yöl-la' guti. Lësca' caní, len yöl-la' huáca queë' usubanë' rë'u.

¹⁵ ¿Naru' cabí nózili', idútë le nácali' naca tuz len le naca cazë' Cristo? ¿Nacxi caz gaca cúali' tu le da' Cristo, en gunli' ga ta' tu nigula udá dzaga? ¡Biti' ca' ral-la' gunli' caní! ¹⁶ ¿Naru' cabí nózili' channö tu bönni' zóalenë'-nu nigula udá dzaga, náquië' tuz len lënu? Ca naca lë ni nazúaj lu guichi lá'ayi le rnna: "Ílácagaquië' ca tuz bönachi iropë' na'."

¹⁷ Na'a, nu bönni' náquië' tuz len Xanru', náquië' tuz len Lë' lu bö' naca cazë'.

¹⁸ Que lë ni na', biti' ca' gunli' le ruá' dö'. Bítitës dul-la' yúbölö runë' tu bönni', ní'ilö lu le naca cazë' runë' dul-la' na'. Nu bönni' runë' dul-la' le lë'ë, runë' dul-la' le dzaga lë cazë'. ¹⁹ ¿Naru' cabí nózili' idútë le naca cázali' naca yudo' queë' Dios Bö' Lá'ayi? Dios caz nuchizë' Dios Bö' Lá'ayi na' libí'ili', ate' Lë' zoë' icja ládxi'do'oli'. Que lë ni na' biti' nequi queë'zili' idútë le naca cázali'. Na'a, nequi queë' Dios. ²⁰ Dios gú'uë' libí'ili' len tu le zxön le gudizxjë'. Guli'gún dxin idútë le nácali', enca' bö' naca cázali' para gaca queë' Dios yöl-la' ba, tu' néquiguequi queë' Dios idútë le naca cázali', enca' bö' naca cázali'.

Rusédinë' Pablo ca naca que yöl-la' nutsaga na'

7 ¹ Na'a, ubi'a didza' yugu' le rinábili' neda', le buzúajli' quia' lu guichi. Gácarö dxi'a queë' nu bönni' channö cabí sóalenë'-nu nigula. ² Tu' tunda' bönachi le ruá' dö' ga ni' zóali', yúgu'të bönni' nabábagaquië' libí'ili' ral-la' ila'cuá'lenë'-nu nigula que queégaquië', ate' yúgu'të nigula ral-la' ila'cuá'lennu-në' bönni' que queégacanu. ³ Bönni' na' zóanu nigula queë' ral-la' gunë' queénu nigula queë' ca naca yöl-la' run que yöl-la' nutsaga na', en la' lébisö ral-la' gunnu nigula len bönni' queénu. ⁴ Biti' dë lu ná'asönu nigula le naca cázanu, pero bönni' queénu dë lu në'ë ca' le. Lësca' caní, biti' dë lu ná'asë' bönni' le naca cazë', pero nigula queë' dë lu ná'anu ca' le. ⁵ Biti' ral-la' ila'dá'baguë'ë luzá'agaquië' bönni', en nigula na', nutsaga ná'agaquië'. Huácasö ca' channö ilunë' tuz didza' biti' ila'dzáguië' tu chí'isö para gaca ulu'lidzë' Dios idú ládxi'gaquië'. Tödi na', bönni' na' ral-la' sóalenë'-nu nigula queë' leyúbölö, para cabí sequi' Satanás tu' xihui' gun ga tsázagaquië' nöza dul-la' tu' cabí gaca ila'nná be'e cuíngaquië'.

⁶ Lë ni rea' libí'ili' naca tu le runnë' Xanru' libí'ili' lataj. Biti' naca le gunná bë'ë. ⁷ Runi neda' gácarö dxi'a ulu'gá'anë' tuz yúgu'të bönni', ca na' zoa' tuza' neda'. Tu tuë' bönni' rizi'ë tsca le runödzjë' Dios queë' gunë'. Tuë' rizi'ë tu le runödzjë', ate' ia'túë' rizi'ë ia'tú le runödzjë'.

⁸ Na'a, rea' nupa zóagaca tuz, enca' yugu' nigula uzëbi, gácarö dxi'a quéguequi ulu'gá'ana tuz ca na' zoa' tuz neda'. ⁹ Channö cabí gaca ila'nná be'e cuíngaquië', huáca ulu'tsaga ná'agaquië', tu' gácarö dxi'a ulu'tsaga ná'agaquië', en cabí ila'zé ládxi'gaquië' le ruá' dö'.

¹⁰ Rinná bé'eda' nupa chinutsaga né'eguequi, en calëga néda'sö runa' xibá ni, pero Lë cazë' Xanru' runë' le, rnnë': "Biti' ulá'alennu tu nigula bönni' queënu." ¹¹ Channö nu nigula ulá'alennu-në' bönni' queënu, ral-la' ugá'ananu túzinu, o huóácanu tuz len bönni' queënu na'. Lësca' caní tu bönni' bití ral-la' ucá'anë'-nu nigula queë'.

¹² Na'a, néda'sö rea' ia'zica'rö bönachi, en calëga rnnë' Xanru' caní, rnníá': Channö zoë' nu böchi' luzá'aru' réajlë'ë Cristo, ate' nigula queë' bití réajlë'ënu Xanru', en channö ré'ëninu ugá'analennu lë', bití ral-la' ulá'alënë'-nu. ¹³ Lësca' caní rnníá': Channö zóanu nu nigula zanru' réajlë'ënu Cristo, ate' bönni' queënu bití réajlë'ë Xanru', en channö ré'ënnë' ugá'analënë'-nu, bití ral-la' ulá'alennu lë'. ¹⁴ ¡Caní ral-la' ilunë'! Bönni' cabí réajlë'ë na', Dios rilé'enë' lë' ca tu bönni' néquinë' quez queë' tu' náquië' tuz len nigula queë' réajlë'ënu Cristo, ate' nigula caní, bití réajlë'ënu, Dios rilé'enë'-nu ca tu nigula néquinu quez queë' tu' nácanu tuz len bönni' queënu náquië' böchi' luzá'aru' réajlë'ë Cristo. La'tu' cabí naca caní, ilácabi' zxí'inigaquië' ca yugu' bi'i lan lahuë' Dios. Na'a, nácagacabi' quez queë' Dios. ¹⁵ Nu bönni' o nigula nu cabí réajlë' Cristo, channö ré'ëni ulá'alén nu na' nutsaga ná'alén, huáca ca'. Bití run bayudxi ugá'analen nu na' böchi' luzá'aru' o zanru' nu réajlë' Cristo, tu' bulidzë' Dios rë'u para cózaru' tsáhui'do'. ¹⁶ ¡Caní ral-la' gaca! Nadxi ca' li', nigula, huáca gunu' ga ulé' bönni' quiu', ate' nadxi ca' li', bönni', huáca gunu' ga ulanu nigula quiu'.

¹⁷ Ral-la' gunru' tu turu' tsca le bennë' queëru' Xanru', enca' tsca guca queëru' cate' bulidzë' Dios rë'u para guéquiru' queë'. Rusédida' yúgu'të cö' bönachi queë' Cristo xibá ni. ¹⁸ Channö Dios bulidzë' nu bönni' narugu lu xipélë'ë le naca bë' néquinë' queë' Dios, ral-la' ugá'anë' caní, zoa lu xipélë'ë lë na' naca bë'. Lësca' caní, channö Dios bulidzë' nu bönni' bití narugu lu xipélë'ë lë na' naca bë', bití ral-la' ichúguië' lë na' lu xipélë'ë. ¹⁹ Bití bi nazaca' lë na' narugu lu xipélë'ë tu bönni', en channö bití narugu lu xipélë'ë bönni' lë na' naca bë', bití bi nazaca'. Le nácada' lesaca' naca gunru' ca rinná bë' xibá queë' Dios. ²⁰ Ral-la' ugá'anë' tu tuë' bönni' ca na' gúquië' cate' ni' bulidzë' Dios lë'.

²¹ Channö bulidzë' li' cate' ni' nacu' bönni' nadó'o, bití cö'u böniga tu' nacu' caní, pero channö gata' quiu' lataj iruju' lu na' xanu', buzí' xibé lataj na' gata' quiu' iruju'. ²² Channö bulidzë' Xanru' nu bönni' cate' ni' nado'ë, lahuë' Xanru' náquië' ca nu bönni' narúajë' lu në'ë xanë' na', para gunë' xichinë' Xanru'. Lësca' caní, channö bulidzë' Xanru' nu bönni' cate' ni' narúajë' lu në'ë xanë' na', bönni' ni náquië' ca tu bönni' nadó'o queë' Cristo. ²³ Zxóntërö le gudizxjë' Dios, gú'uë' libí'ili'. Que lë

ni na' biti' ral-la' guti' cuinli' lu ná'agaca bönachi. ²⁴ Que læ ni na' ca', böchi' luzá'ado', ral-la' sóali' lahuë' Dios tsca guca queëli' tu tuli' cate' ni' bulidzë' Dios libí'ili'.

²⁵ Ca naca quégaca nupa biti' nutsaga ná'agaca, biti' bi gunná bé'enë' Xanru' neda'. Caní runi neda', ate' huáca uzxöni ládxi'li' neda' tu' ruhuéchi' ládxë'ë Xanru' neda'. ²⁶ Tu' taca zián le raca queëru' dza ni zóaru' na'a, runi neda' gácarö dxi'a channö ulu'gá'anë' yúgu'të bönni' ca ná'cagaquië' na'a. ²⁷ Channö nutsaga ná'lenu'-nu nigula, biti' ulá'alenu'-nu. Lësca' caní, channö zu' tuzu', biti' quilju' tu nigula para utsaga ná'lenu'-nu. ²⁸ Na'a, channö utsaga ná'lenu'-nu nigula, biti' gunu' dul-la', en channö tu bi'i nigula utsaga ná'aleni'-në' bönni', biti' gunbi' dul-la', pero ila'guí'i ila'zaca' nupa nutsaga ná'agaca yödzölió ni, ate' ré'ënda' guna' ga uláli' lu yöl-la' riguí'i rizaca' na'.

²⁹ Na'a, rea' libí'ili' læ ni, böchi' luzá'ado'. ¡Chizóa idxín dza údxi! Que læ ni na', yugu' bönni' nutsaga ná'lengaquië'-nu nigula ral-la' iluí' ládxi'gaquië' Dios, ca runë' nu bönni' biti' nutsaga ná'aleni' nigula.

³⁰ Lësca' caní, nupa ta'bödxi yechi' ral-la' ulu'dzeja lahuë' Dios ca run nu biti' ribödxi, ate' nupa tu'dzeja ral-la' ila'cuá' nöxaj lahuë' Dios ca run nu biti' rudzeja, ate' nupa to'o ral-la' ilaca ca nu biti' bi dë que. ³¹ Nupa tu'gún dxin le dë yödzölió ni ral-la' ilaca ca nu biti' ruí'i ladxi' le dë yödzölió ni, tu' udödi quégaca le rilé'eru' yödzölió ni.

³² Ré'ënda' biti' ubi uguí'ili'. Tu bönni' biti' zóanu nigula queë' ruí'i ládxë'ë le nequi queë' Xanru', naca gunë' le raza ládxë'ë Xanru'. ³³ Tu bönni' nutsaga ná'lenë'-nu tu nigula ruí'i ládxë'ë le raca yödzölió, naca gunë' le raza ládxi'nu nigula queë'. ³⁴ Lësca' caní raca queënu tu nigula nutsaga ná'lennu-në' bönni', en queënu nigula na' zóanu túzinu. Nigula na' zóanu túzinu ruí'i ládxi'nu le nequi queë' Xanru', naca sóanu quez queë' Dios lu le naca cázanu, en lu bö' naca cázanu. Nigula na' nutsaga ná'lennu-në' tu bönni' ruí'i ládxi'nu le raca yödzölió ni, naca gunnu le raza ládxë'ë bönni' queënu.

³⁵ Yugu' læ ni rea' libí'ili' para uzí'ili' xibé læ ni, en calëga para uzága'a xinözili'. Ré'ënda' gunli' le ral-la' gunli', para gunli' xichinë' Xanru' idú ládxi'li'.

³⁶ Channö zoë' tu bönni' réquinë' biti' naca dxi'a ugá'anabi' túzibi' bi'i nigula ra'bando' queë', en chizóa iz queëbi', en ré'ënide'ebi' utsaga ná'aleni'-në' bönni', huáca utsaga ná'aleni'-në'. ¡Biti' gunbi' dul-la'!

³⁷ Channö chinún tsutsu xtídzë'ë bönni' na', en biti' run bayudxi gunë' caní, en dë lu në'ë naca gunë', en chinún tsutsu xtídzë'ë ugá'anabi' túzibi', gunë' le naca dxi'a bönni' na'. ³⁸ Caní naca, nu ruí'i lataj bi'i que utsaga ná'aleni'-në' bönni', run le naca dxi'a, pero nu run ga ugá'anabi' túzibi' run le nácarö dxi'a.

³⁹ Nigula na' nutsaga ná'lennu-në' bönni', rinná be'e xibá que yöl-la' nutsaga na' lænu tsanni ni zoë' nabanë' bönni' queënu. Channö gátie'

bönni' queénu, gata' lu ná'anú utsaga ná'lennu-në' nu bönni' ré'ëninu, channö réajlë'ë Xanru' bönni' na'. ⁴⁰ Runi neda' gácarönu bica' ba channö ugá'ananu túzinu, en réquida' Bö' Lá'ayi queë' Dios runë' neda' tzazxón.

Le ta'gú'u bönachi lógaca budó' guió'j budó' yaga

8 ¹ Na'a, gu'a didza' ca naca que le rë'aj ráguru', lë na' gula'gú'u bönachi lógaca budó' guió'j budó' yaga. Ta'nná bönachi: “Yúgu'tëru' náparu' yöl-la' réajni'i.” iNácatë didza' ni! Yöl-la' réajni'i caní run ga run ba zxön cuinru', pero yöl-la' nadxí'i queéru' luzá'aru' run ga rácalenru' luzá'aru'. ² Channö zoë' nu bönni' réquinë' chiréajni'inë', biti' bi réajni'ininë' ca ral-la' tséajni'inë', ³ pero nu bönni' nadxí'inë' Dios, Dios caz zóalenë' bönni' na'.

⁴ Na'a, ca naca que le rë'aj ráguru', lë na' gula'gú'u bönachi lógaca budó' guió'j budó' yaga, nóziru' biti' bi nazáca'gaca budó' guió'j budó' yaga na' yödzo'lió ni, en cúnturö nu zoa naca Dios. ⁵ Sal-la' nacuá' le téquiquequi bönachi náca'gaca dios, le nacuá' lúzxiba, en le nacuá' luyú, ate' zían le tu'lidza bönachi, en tuí'i lágaca: dios, enca': xan, ⁶ pero queéru' rë'u:

Tuzë' náquië' Dios, Lë' Xuz.

Lë' benë' yúgu'të le rilé'ëru',

ate' zóaru' nabanru' para tseaj ládxi'ru' Lë'.

Tuzë' náquië' Xanru', Lë' Jesucristo.

Lu në'ë Lë', Dios benë' yúgu'të le dë,

ate' nabániru' Lë'.

⁷ Calëga yúgu'të böchi' luzá'aru' ta'yéajni'inë' lë ni. Bal-lë', nupa ni' zí'alö gula'yéaj ládxi'gaca budó' guió'j budó' yaga, ga ridxintë na'a dza të'aj tahuë' le gula'gú'u bönachi lógaca budó' guió'j budó' yaga, ate' téquinë' napa yöl-la' huáca que budó' na'. Tu' cabí naca idú ládxi'gaquië', que lë ni na' téquinë' nabága'gaquië' xíguia' channö tahuë' lë na'. ⁸ Biti' gun le guí'aj gáguru' ga gunë' Dios rë'u bal. Channö gáguru' le, biti' gácaröru' dxi'a, en channö cabí gáguru' le, biti' gácaröru' cá'asö. ⁹ Dë lu ná'ali' guí'aj gáguli' bíti'tës. Guli'gún chi'i cuinli' para cabí gunli' ga ila'chixi ila'nigui nupa biti' naca idú ca ta'yéajlë' Cristo. ¹⁰ Nadxi ca' li' réquinu' napu' yöl-la' réajni'i ca naca lë ni, en huáca gagu' bíti'tës. Channö cö'u xilataj budó' guió'j budó' yaga, en guí'aj gagu' le gula'gú'u bönachi lo budó' guió'j budó' yaga na', ate' channö nu böchi' luzó'o biti' naca idú ládxi'ë ilé'enë' li', rö'u ragu' ni', nadxi ca' gunu' ga gahuë' lë na' gula'gú'u bönachi lo budó' guió'j budó' yaga na'. ¹¹ Caní gaca, tu' réquinu' napu' yöl-la' réajni'i, gunu' ga ichixi iníguinë' böchi' luzó'o biti' naca idú ládxi'ë. ¿Naru' guntso' caní queë' böchi' luzó'o, ni'a que nu na' gútië' Cristo? ¹² Channö caní gunu', gunu' dul-la' tu' usubágu'u böchi' luzó'o xíguia', en gunu' ga ichixi iníguinë'

tu' cabí naca idú ládxë'ë, en gunu' ca' dul-la' le ruzóa Cristo tsölá'alö.
¹³ Que lë ni na', channö le guí'aj gahua' gun ga ichixi iníguinë' böchi' luzá'a, bíti'rö gahua' bëla' na', para cabí guna' ga gunë' böchi' luzá'a dul-la'.

Le dë lu në'ë nu bönni' gubáz nasól-lë'ë Cristo

9 ¹ ¿Naru' cabí naca' gubáz nasól-lë'ë Cristo? ¿Naru' cabí nadéli'da' yöl-la' rusölá? ¿Naru' cabí bilé'eda'-në' Xanru' Jesús? ¿Naru' cabí nácali' queë' Cristo ni'a que dxin bena' neda' uláz queë' Xanru'? ² Nadxi ca' téquiguequi ia'zíca'rö bönachi bití' naca' gubáz nasól-lë'ë Cristo. Libí'ili' run bayudxi guéquili' naca' gubáz queë' Cristo. Tu' nácali' queë' Xanru', le naca cázali' naca bë' naca' gubáz nasól-lë'ë Xanru'.

^{3,4} Nacuá' nupa ta'zí' quidza' neda'. Caní rubi'a didza', rea' légaquië': Dë lu na'a inaba' le guí'aj gahua' tu' runa' dxin ni. ⁵ Lësca' caní dë lu na'a utsaga ná'alena'-bi' tubi' bi'i nigula zanru' réajlë'ëbi' Cristo para gunbi' neda' tsözxón ga ridá', ca na' tunë' ia'zíca'rë' gubáz nasól-lë'ë Cristo, en yugu' bönni' böchë'ë Xanru', enca' Pedro. ⁶ ¿Naru' réquili' tuza' neda', en Bernabé ral-la' guntu' dxin lahui' dza, para idzólitu' le gágutu'? ⁷ ¿Nuzxi caz bönni' rejë' gudil-la, ate' riguizxjë' la' cuinsë'? ¿Nuzxi caz bönni' rudë'ë tu la' yëla que lubá uva, en bití' rahuë' le ribía lubá na'? ¿Nuzxi caz bönni' rapa chi'ë-ba' bö'cu' zxila', en bití' re'jë' nidxi' quégacaba'? ⁸ Bití' guéquili' la' néda'sö ruá'a caní didza'. Lësca' caní rnna le nazúaj lu guichi lu xibá queë' Moisés. ⁹ Lu xibá queë' Moisés nazúaj lu guichi le rnna: Bití' cu'u du rúa'aba' bëdxi cate' rulíbiba' xzoa' xtila. Bë'ë Dios didza' ni, calégasö tu' ruí'i ládxë'ë-ba' bëdxi, ¹⁰ pero para uzí'iru' ca' xibé rë'u. Que lë ni na' nazúaj lu guichi didza' na', ate' bönni' na' rugá'anë'-ba' bëdxi, enca' bönni' na' runë' ga tu'líbiba' bëdxi xzoa' xtila, iropë' na' ral-la' ilunë' löza ila'zi'ë que le rulá' luyú na'. ¹¹ Na'a, channö bentu' dxin ga zóali', le naca ca dxin guz gú'una, lë na' naca queë' Dios Bö' Lá'ayi, ¿naru' réquitseli' bití' ral-la' uzí'itu' xibé tu le do' dë queéli' ca na' ruzi'ë xibé bönni' guz gú'una le rulapë'? ¹² Ia'zíca'rö bönachi tu'zéajni'inë' libí'ili' tu'zi'ë xibé le dë queéli'. ¿Naru' cabí rála'tërö uzí'itu' xibé netu' le dë queéli'?

Catu caz buzi'tu' xibé lë ni dë lu na'tu', pero biá' gulentu' yúgu'të para gaca guntu' libán que didza' dxi'a ca naca queë' Cristo. ¹³ Nöz quézili' ca raca quégaca nupa tun dxin que yudo', tu'zí' xibé gun que yudo'. Lësca' caní nupa ta'gú'u rön quégacaba' böa' bëdxi lu bucugu lá'ayi queë' Dios, tahuë' bëla' quégacaba' böa' bëdxi na'. ¹⁴ Lësca' caní nuzóë' Xanru' ca ral-la' gaca quégaquië' bönni' tunë' libán que didza' dxi'a. Nupa tu'zí' xibé libán na' tunë' ral-la' ulu'gagu légaquië'. ¹⁵ Neda' catu caz buzi'a xibé lë ni dë lu na'a, ate' lë ni ruzúaja' lu guichi ni bití' naca le rinábini nu bi gunna quia'. Run ba zxön cuina' tu' cabí nazxja'

cate' runa' libán que didza' dxi'a. Gué'ënitéra' gátia' ca gu'a lataj nu inné runa' libán na' tu' nazxja'.

¹⁶ Biti' dē lu na'a gun ba zxön cuina' tu' runa' libán que didza' dxi'a, tu' run bayudxi guna' libán que. Bica' bayechi' neda' channö cabí guna' libán que didza' dxi'a. ¹⁷ La'tu' runa' libán tu' ré'ëni quézida', huáca inaba' lazxa', pero run bayudxi guna' libán, tu' naca tu le busubáguë Dios neda' guna'. ¹⁸ ¿Bizxi lazxa' uzi'tsa' xibé channö? Ruzi'a xibé le raza ládxa'a tu' cabí nazxja' cate' runa' libán que didza' dxi'a. Biti' ca' ruzi'a xibé lē na' dē lu na'a tu' runa' libán que didza' dxi'a.

¹⁹ Na'a, sal-la' cuntú nu yu'a lu në'e, chibén cuina' ca tu bönni' nadó'o quégaca yúgu'tē bönachi para gaca guna' ga ulu'lágaca zíanrö ca' bönachi. ²⁰ Cate' runa' libán lógaca bönachi judío, run cuina' ca tu bönni' judío para gaca guna' ga ulu'lágaca bönachi judío na'. Bönachi judío na' tun ca rinná bē' xibá queë' Moisés. Que lē ni na' run cuina' ca tu bönni' runē' ca rinná bē' xibá na' sal-la' bití yu'a lu na' xibá na'. Caní runa' para gaca guna' ga ulu'lágaca nupa tun ca rinná bē' xibá na'.

²¹ Cate' runa' libán lógaca bönachi izá'a, nupa bití rinná be'e xibá queë' Moisés léguequi, run cuina' ca tu bönni' zi'tu' na', para gaca guna' ga ulu'lé'. Bití rucá'ana' cá'asö xibá queë' Dios. Neda' runa' ca rinná bē' xibá queë' Cristo. ²² Run cuina' ca tu bönni' bití naca idú ca réajlë' Cristo para gaca guna' ga ulu'lágaca nupa na' bití naca idú ca ta'yéajlë' Lē'. Run cuina' ca nácagaca yúgu'tē bönachi para gaca guna' ga ulu'lágaca bal-la bönachi na'. ²³ Lu yúgu'tē lē ni runa', runa' ga ta'yöni bönachi didza' dxi'a, para gaca uzi'a xibé tsözxön len libí'ili' didza' dxi'a na'.

²⁴ Chinóz quézili' ca tunē' bönni' nútsa'gaquië' lu huitaj. Ta'xíti'ë yúgu'tē', pero tuzē' bönni' idéli'nē' uzi'ë xibé lataj lo. Lēasca' caní ral-la' gunli' xichinē' Dios, gácali' ca bönni' nútsa'gaquië' lu huitaj, para idéli'li' uzí'ili' xibé le ubi'ë Dios queéli'. ²⁵ Yúgu'tē bönni', cate' tu'pá'a cúngaquië' para gaca ila'yázië' lu huitaj, ta'nná be'e cúngaquië' lu yúgu'tē le tunē'. Tunē' caní para ila'déli'nē' tu bregui' zin le inítitē, pero idéli'ru' rē'u tu le uzí'tica'siru' xibé. ²⁶ Que lē ni na', naca' neda' ca tu bönni' idú ládxe'ë rixíti'ë. Naca' ca' ca tu bönni', idú ládxe'ë ridil-lē'. Bití rucudxa' lu bö'ös. ²⁷ Ca runē' bönni' na' rulidzē' bönachi para tsöjtsázagaca lu huitaj, runa' ca' neda', runa' libán para ulu'lágaca bönachi. Bönni' na' nútsē'ë lu huitaj runē' ga gaca tsutsu idútē le naca cazē', en rinná bé'enē' le. Lēasca' caní runa' neda', para cabí unítia' xilatja' lu dxin queë' Dios.

Biti' ral-la' tseaj ládxi'ru' budó' guió'j budó' yaga

10 ¹ Ré'ënda' uzéajni'ida' libí'ili', böchi' luzá'ado', ca guca quégaquië' xuz xtó'otu'. Dios benē' ga gulú'u zxul-la tu böaj yúgu'tē'. Lēasca' caní, gula'dödē' yúgu'tē' gatsaj láhui'lö nísado'. ² Lu

böaj ni', en lu nísado' ni', guca quégaquië' ca raza que nu ridila nisa. Lë na' guca quégaquië' guca bë' guláquië' tuz len Moisés. ³ Lësca' caní, gulahuë' yúgu'të' yöta xtildo' na' bunödzejë' Dios Bö' Lá'ayi quégaquië'. ⁴ Gulé'ajë' yúgu'të' nisa na' bunödzejë' Dios Bö' Lá'ayi quégaquië', tu' gulé'ajë' nisa birúaj lë'e guió'j na' bulu'e lahui Dios Bö' Lá'ayi, guió'j na' gula'bánnin' légaquië'. Ca guca guió'j na' naca cazë' Cristo, nabániru' Lë'. ⁵ Sal-la' guca caní, bití' guyaza ládxë'ë Dios yúgu'të'. Que lë ni na' gulátië' lu lataj cá'asö.

⁶ Yúgu'të lë ni naca tu le ruzéajni'i rë'u, para cabí së ládxi'ru' le ruá' dö', ca na' gula'zë ládxi'gaquië' légaquië'. ⁷ Bití' ral-la' tseaj ládxi'ru' budó' guió'j budó' yaga, ca na' gulunë' bal-lë' légaquië'. Nazúaj lu guichi lá'ayi le rnna: "Gula'bö'ë bönni' ni', en gulé'aj gulahuë', ate' gula'yasë', en gulunë' laní que budó' na'." ⁸ Bití' ral-la' gunru' le ruá' dö', ca na' gulunë' bal-lë' légaquië' le ruá' dö', ate' tu dzasö gulátië' idú ca tsonna-uruá' milë'. ⁹ Bití' ral-la' si' bë'ëru' Xanru', ca na' gula'zí' bë'ë Lë' bal-lë' légaquië', ate' gulátië' tu' guláguya'aba' bëla sínia' légaquië'. ¹⁰ Lësca' caní, bití' ral-la' innëru' queë' Dios ca na' gula'nnë' queë' bal-lë' légaquië', ate' tuë' gubáz lá'ayi queë' Dios busunítië' légaquië'.

¹¹ Yúgu'të lë ni le gulaca quégaquië' xuz xtó'otu', tu'zëajni'i rë'u, en nazúaj lu guichi lá'ayi para gun gadxi rë'u, tu' chizóaru' dza chizóa údxi que yödzölió ni. ¹² Que lë ni na', nu réqui chinal-la, ral-la' gun chi'i cuini, para cabí ichixi inigui. ¹³ Ca naca le ta'zí' bë' libí'ili' raza ca' quéguequi yúgu'të bönachi. Dios runë' ca rnnë', en bití' gu'ë lataj bi si' bë' libí'ili' le cabí gaca guá' ilenli', pero cate' bi si' bë' libí'ili', uluí'inë' libí'ili' naca gaca irúajli' lu na' tu' xihui', para gaca guá' ilenli'.

¹⁴ Que lë ni na', böchi' luzá'ado', bití' tseaj ládxi'li' budó' guió'j budó' yaga. ¹⁵ Ruí'ilena' libí'ili' didza' ca ruí'ilena' didza' nupa ta'yéajni'i. Buli'chi'a buli'söró didza' ni gu'a. ¹⁶ Cate' inábiru'-në' Dios gun lá'ayë' le ré'ajru' cate' rusubanru' ca gútië' Cristo, lë na' ré'ajru' ruluí'i nácaru' tuz len Cristo, en ruzí'iru' xibé le benë' Cristo cate' bulaljë' xichönë' cate' gútië' lë'e yaga cruz. Lësca' caní, yöta xtila na' ruzxúzxjaru', en ráguru', ruluí'i dzágaru'-në' Cristo, en ruzí'iru' xibé le benë' Cristo cate' budödë' idútë le naca cazë' uláz queëru'. ¹⁷ Sal-la' zianru' nácaru', yúgu'tëru' ráguru' tuz yöta xtila na', en que lë ni na' nácaru' ca tuz bönachi.

¹⁸ Buli'yútsöca' ca tunë' bönni' Israel. Bönni' ni' tahuë' lahuë' Dios le ta'gu'ë lu bucugu lá'ayi queë', lë na' tahuë' ruluí'i dzágagaquië' Dios.

¹⁹ ¿Bizxi rnna didza' ni ruá'a? Bití' rnnía' napa budó' guió'j budó' yaga yöl-la' huáca, en le ta'gú'u bönachi lógaca budó' guió'j budó' yaga na' bití' napa yöl-la' huáca. ²⁰ Caní rnnía': Lë na' ta'gú'u bönachi bití' núnbë'gaquië' Dios lógaca budó' guió'j budó' yaga, ta'gú'u lógaca bö' xihui', en calëga lahuë' Dios. Ré'ënda' bití' idzágalí' yugu' bö' xihui'.

²¹ Bití' gaca guí'jali' le ruluí'i nácaru' tuz len Xanru', enca' lë na' uluí'i

nácali' tuz len yugu' bö' xihui'. Biti' gaca gáguli' le ruluí'i dzágaru'-nē' Xanru', enca' le uluí'i dzágali' yugu' bö' xihui'. ²² ¿Naru' gúntsaru' ga uzxé'enē' Xanru'? ¿Naru' réquitseli' nápatērōli' yöl-la' huáca ca napē' Lē'?

Le dē lu ná'aru' gunru', en ca ral-la' idxí'igacru'-nē' böchi' luzá'aru'

²³ Naca idútē li didza' na' rnna: “Yúgu'tē dē lu ná'aru' gunru'.” Na'a, neda' rnní'a: Calēga yúgu'tē ral-la' gunru'. Yúgu'tē dē lu ná'aru' gunru', pero calēga yúgu'tē gun ga gácarō idú ca réajlě'ēru' Cristo. ²⁴ Ral-la' güí'i ládxi'ru' gunru' le gun ga gaca dxi'a quégaquiē' böchi' luzá'aru', en calēgasō le gun ga gaca dxi'a que la' cuínsiru'.

²⁵ Bítí'tēs bi tuti' bönachi lu yé'ēyi, huáca gáguli', en biti' bi ral-la' inábali' que, para cabí cuéqui böniga ládxi'do'oli'. ²⁶ Nazúaj lu guichi le rnna: “Queē' Xanru' nequi yödzōlió ni, enca' yúgu'tē le dē yödzōlió ni.”

²⁷ Channō ulidzē' tu bönni' biti' réajlě'ē Dios libí'ili' para guídali' lidxē', ate' gué'ēnili' tséajli', guli'gagu yúgu'tē le cu'ē loli', en biti' bi inábali' que, para cabí cuéqui böniga ládxi'do'oli'. ²⁸ Channō núti'tēs nu guíē libí'ili': “Lē ni gula'gu'ē lo budó' guiój budó' yaga”, biti' gáguli' lē na' para gaca dxi'a que nu na' gudíxjöi'i caní libí'ili', en para cabí cuéqui böniga ládxi'da'ahuē'. ²⁹ Rnní'a: Para cabí cuéqui böniga ládxi'da'ahuē' bönni' na' gudíxjöi'inē' caní libí'ili', en calēga para cabí cuéqui böniga ládxi'do'oli' libí'i cázali'.

Nadxi ca' nu inábini neda', inná: “¿Bíxx que ral-la' uzóa' tsölá'alō le dē lu na'a guna' tu' ribequi böniga ládxi'da'ahuē' bönni' yúbölō?”

³⁰ Huáca inná ca' nu na': “Channō guía'-nē' Dios: Xclenu', ni'a que lē na' rahua', ¿bíxx que nu uzegui neda' didza' ni'a que lē na' rahua'?”

³¹ Channō bi gáguli' o bi guí'jali', o bítí'tēs bi gunli', guli'gún yúgu'tē para gaca queē' Dios yöl-la' ba. ³² Biti' bi gunli' le gun ga ila'chixi ila'nigui bönachi judío, en biti' gunli' le gun ga ila'chixi ila'nigui bönachi biti' nácagaca judío, en biti' gunli' le gun ga ila'chixi ila'nigui bönachi queē' Dios. ³³ Guli'gún ca runa' neda'. Ruí'i ládxa'a guna' le ila'yaza ládxi'gaca yúgu'tē bönachi, en biti' ruí'i ládxa'a guna' le uzi'a xibé la' néda'sō, pero le ulu'zí' xibé ia'zica'rō bönachi para ulu'lágaca.

11 ¹ Guli'gún ca runa' neda', ca na' neda' ca' runa' ca benē' Cristo.

Le tunnu nigula lógaca bönachi queē' Cristo

² Runa' libí'ili' zxön, böchi' luzá'ado', tu' röjnéti'ca'sili' neda', en nazí' lu ná'ali' xibá budōda' lu ná'ali'. ³ Na'a, ré'ēnda' tséajni'ili' rinná bé'enē' Cristo yúgu'tē bönni', ate' bönni' rinná bé'enē'-nu nigula, ate' Dios rinná bé'enē' Zxí'inē', Bönni' na' náquiē' Cristo. ⁴ Channō tu bönni' rulidzē' Dios, o ru'ē didza' uláz queē' Dios, en dxía icjē' xilu'ē, rucá'anē' Cristo cá'asō. ⁵ Na'a, channō tu nigula rulídzanu Dios, o ruí'inu didza' uláz

queë' Dios, en biti' bi zxoá ícjanu, rucá'ananu bönni' queënu cá'asö, en naca queënu ca naca queënu tu nigula narugu guitsa' ícjanu. ⁶ Channö tu nigula cabí bi zxoá ícjanu, ral-la' irugu ca' guitsa' ícjanu. Channö gun ga utuí'inu nigula na' channö nu chugu guitsa' ícjanu, ral-la' bi ixóá ícjanu. ⁷ Tu bönni' biti' bi ral-la' udxía ícjè' cate' ridxinè' lahuè' Dios, tu' náquiè' ca naca cazè' Dios, ate' lè na' náquiè' bönni' ruluí'i lahui yöl-la' zxön queë' Dios, pero le nácanu nigula na' ruluí'i lahui yöl-la' zxön queë' bönni' queënu. ⁸ Cate' benè' Dios bönachi, biti' bubéajè' bönni' na' lu nigula. Nigula na', lu bönni' na' bubéajè'-nu. ⁹ Lësca' caní, biti' benè' Dios bönni' para uzí'inu xibè' nigula, pero benè' nigula para uzi'è xibánu bönni'. ¹⁰ Que lè ni na', nigula na' ral-la' ixóá ícjanu le ruluí'i zoa nu rinná be'e lènu tu' tu'yúè' gubáz lá'ayi queë' Dios rè'u. ¹¹ Na'a, lahuè' Xanru', tu bönni' riquinnè'-nu nigula queë', ate' nigula na' riquíninu-nè' bönni' queënu. ¹² Ca na' benè' Dios, bubéajè'-nu nigula lu bönni', lësca' caní na'a, yúgu'tè bönni' náljlengaquiè'-nu nigula, ate' yúgu'tè rirúaj lu nè'è Dios.

¹³ Buli'chi'a buli'söró la' libí'isili'. ¿Naru' ral-la' ulídzanu-nè' Dios tu nigula biti' bi zxoá ícjanu? ¹⁴ ¿Naru' cabí rusèdi libí'ili' yöl-la' nácatè quégaca bönachi, ral-la' utuí'inè' bönni' na' ru'è lataj itunna guitsa' ícjè'? ¹⁵ Na'a, channö natúnna guitsa' ícjanu tu nigula, naca yöl-la' lachi queënu, tu' bè'è Dios queënu guitsa' ícjanu para usubín ícjanu.

¹⁶ Channö zoa nu gué'èni tá'baga' didza' ni, canísö nazí' lu na'tu' runtu', en lébisö tun yugu' cö' bönachi queë' Dios.

**Bönachi Corinto tu'cá'ana cá'asö le rè'aj ráguru'
para usubanru' ca gútiè' Xanru'**

¹⁷ Biti' runa' libí'ili' bal ca naca le uzéajni'ida' libí'ili' na'a. Le runli' biti' run ga raca dxi'a queéli' cate' rudúbili' queë' Cristo, pero run ga raca queéli' le cabí naca dxi'a. ¹⁸ Risí lahua' ruzéajni'ida' libí'ili' lè ni ta'guíxjöi'i bönachi neda', ta'nná: “Cate' rudúbili' queë' Cristo, narúajli' choplö”, ate' réajlè'a nadxi ca' naca caní. ¹⁹ Run bayudxi ila'cuá'alén libí'ili' nupa tu'sedi le cabí nácatè para ilaca bè' nupa nácagaca idú bönachi queë' Cristo. ²⁰ Que lè ni na', cate' rudúbili', lè na' ráguli' tsözxón biti' naca le rè'aj ráguru' para usubanru' ca gútiè' Xanru'.

²¹ Caní naca, tu' runli' bayudxi tu tuli' ráguli' le nuá'ali' que queéli' cate' ráguli' tsözxón, ate' que lè ni na' ridunli' bál-lali', ate' ia'bál-lali' rè'aj ráguli' ga ridxintè rizúdxili'. ²² ¿Naru' cabí zoa lídxili' ga huáca guí'aj gáguli'? Ca na' runli', rucá'anali' bönachi queë' Dios cá'asö, en runli' ga tu'tuí'i nupa biti' bi dè quéguequi. ¿Bizxi caz guía' libí'ili'? ¿Naru' guntsa' libí'ili' bal? Biti' ca' runa' libí'ili' bal ca naca lè ni runli'.

Le rë'aj ráguru' para usubanru' ca gútië' Xanru'

²³ Xanru' caz budödë' lu na'a lë na' busédida' libí'ili', ca na' benë' Xanru' Jesús yëla ni' cate' nu budödi Lë' lu ná'agaquië' bönni' gulútië' Lë'. Gudélë'ë yöta xtila, ²⁴ en cate' budxi gudxë' Dios: "Xclenu'", buzuxzjë' le, en gunné': "Guli'gagu. Lë ni naca xipéla'a le nayuzxaj uláz queéli'. Guli'gún caní, para usubanli' ca gaca quia' neda'." ²⁵ Lësca' caní, gudödi gulahuë', gudélë'ë tu zxíga'do', en gunné': "Le yudzu zxíga'do' ni naca xichöna', le run tsutsu didza' cubi rucá'ana tsahui'. Guli'gún caní yúgu'të luzuí guí'jali' le, para usubanli' ca gaca quia' neda'." ²⁶ Caní gaca ga idxintë dza huödë' Xanru'. Yúgu'të luzuí gáguli' yöta xtila caní, en guí'jali' que le yudzu zxíga'do' caní, uluí'ili' lahui ca gútië' Xanru'.

Ca ral-la' gunru' cate' guí'aj gáguru' para usubanru' ca gútië' Xanru'

²⁷ Que lë ni na', núti'tës nu gagu yöta xtila ni o guí'aj que le yudzu zxíga'do' ni queë' Xanru', en biti' run le bal, nabaga' xíguia' nu na', en run dul-la', tu' rucá'ana xipélë'ë Xanru', enca' xichönë' cá'asö. ²⁸ Que lë ni na', ral-la' uchi'a usöröru' la' cuínsiru' tu turu', ate' ní'irö huáca gáguru' yöta xtila ni, en guí'ajru' que le yudzu zxíga'do' ni. ²⁹ Núti'tës nu rë'aj ragu lë ni, en biti' run le bal tu' cabí réquibe'e ruluí'i le guca queë' Xanru', rusubaga' cuini dul-la' ni'a que lë na' rë'aj ragu. ³⁰ Que lë ni na' te'e zían nupa dzágagaca libí'ili', en ta'cuídi', ate' ziónguequi chinátigaca. ³¹ La'tu' uchi'a usöröru' la' cuínsiru', biti' uchi'a usöröë' Xanru' rë'u. ³² Channö gun bayudxi uchi'a usöröë' Xanru' rë'u, usaca' zi'ë rë'u, para cabí irugu queëru' cate' ichúguië' quéguequi bönachi yödzölió ilátigaca.

³³ Que lë ni na', böchi' luzá'ado', cate' udúbili' para guí'aj gáguli' para usubanli' ca gútië' Xanru', guli'cöza luzá'ali'. ³⁴ Channö zoa nu ridún, ral-la' gagu nu na' ga naca lu yu'u lidxi, para cabí gun bayudxi uchi'a usöröë' Dios libí'ili' cate' udúbili'. Nacuá' ia'bal-la le runli', pero ucá'ana' tsahui' yugu' lë na' cate' uduyúa' libí'ili'.

Yugu' yöl-la' huáca runnë' queëru' Dios Bö' Lá'ayi

12 ¹ Na'a, böchi' luzá'ado', ré'ënda' tséajni'ili' ca zeaj naca yöl-la' huáca runnë' queëru' Dios Bö' Lá'ayi.

² Nöz quézili' ca guca cate' ni' biti' réajlë'ënili' Cristo, bé'ëli' lataj gula'ché' bönachi libí'ili' ga yúbölö. Guyéaj ládxi'li' budó' guiój budó' yaga, le cabí ta'nnë. ³ Que lë ni na', ruzéajni'ida' libí'ili' caní, rnnía': Lada'j yúgu'të nupa tuí'i didza' uláz queë' Bö' Lá'ayi queë' Dios, cuntu nu gaca innë xihui' queë' Jesús, en nitüë' gaca innë: "Jesús náquië' Xanru'", channö cabí zóalenë' Dios Bö' Lá'ayi nu na'.

⁴ Na'a, nadzá'gaca tu tu le runnë' Dios Bö' Lá'ayi queëru', pero tuzë' náquië' Bö' Lá'ayi na'. ⁵ Lësca' caní, nadzá'gaca tu tu dxin rigü'ë Xanru'

lu ná'aru', pero tuzè' náquiè' Xanru' na'. ⁶ Nadzá'gaca ca' tu tu yöl-la' huáca náparu' le rúniru' xichinè' Dios, pero tuzè' náquiè' Dios, Nu na' runna yöl-la' huáca na' queéru' para gunru' xichinè'. ⁷ Dios runnè' que queéru' tu le naca bè' náparu' yöl-la' huáca queè' Dios Bö' Lá'ayi, lè na' ruzí'iru' xibé yúgu'tèru'. ⁸ Dios Bö' Lá'ayi runödzjè' queè' tu bönni' yöl-la' huáca ru'è didza' len yöl-la' rácada', ate' ia'túè' bönni', Lè cazè' Bö' Lá'ayi runödzjè' queè' yöl-la' huáca ru'è didza' lu yöl-la' réajni'i. ⁹ Lësca' caní, Lè cazè' Dios Bö' Lá'ayi na' runödzjè' queè' ia'túè' bönni' yöl-la' réajlè' Cristo bi gunè', ate' ia'túè' bönni' runödzjè' queè' yöl-la' huáca ruúnè' nupa te'e. ¹⁰ Ia'túè' bönni' runödzjè' queè' yöl-la' huáca runè' yugu' yöl-la' huáca que yehua' yubá, ate' ia'túè' bönni' ru'è lè' lataj ru'è didza' uláz queè' Dios, ate' ia'túè' bönni' runödzjè' queè' yöl-la' huáca réquibe'enè' channö bö' dzaga nu bönni' nequi queè' Dios, o nequi que tu' xihui'. Runödzjè' queè' ia'túè' bönni' yöl-la' huáca ru'è didza' yúbölö le cabí nazèdè', ate' queè' ia'túè' bönni' yöl-la' huáca rudödè' didza' yúbölö na' biti' nazèdè'. ¹¹ Yúgu'tè lè ni runè' Lè cazè' Dios Bö' Lá'ayi, tu' runödzjè' que tu tu bönachi tsca ré'èni quézinè'.

Yúgu'tèru' nácaru' ca tuz bönachi

¹² Ca na' naca tuz idútè le naca cázaru', sal-la' zían le nagudi' dzágalenru', ate' le zían na' nagudi' dzágalenru' nácagaca tuz idútè le naca cázaru', lësca' caní naca queè' Cristo. ¹³ Tu' zóalenè' Lè cazè' Dios Bö' Lá'ayi rè'u, lè ni naca queéru' ca tu le nadílaru' nisa, le naca bè' nácaru' ca tuz bönachi, sal-la' nácaru' yugu' bönni' judío, en yugu' bönni' zi'tu', enca' yugu' bönni' nadó'ogaquiè', en yugu' bönni' biti' nadó'ogaquiè'. Yúgu'tèru', Dios bè'è rè'u lataj sí'iru' le runödzja cazè' Bö' Lá'ayi.

¹⁴ Na'a, lu idútè le naca cázaru', zían le nagudi' dzágalenru', en calëga tuz. ¹⁵ La'tu' huáca güí'i didza' ní'aru', huanná: “Tu' cabí naca' nè'è bönni', biti' néquida' queè'”, didza' ni biti' gun ga biti' nequi queè' bönni' na'. ¹⁶ La'tu' huáca güí'i didza' nágaru', huanná: “Tu' cabí naca' guió'j lahuè', biti' néquida' queè' bönni' ni”, didza' ni biti' gun ga biti' nequi queè' bönni' na'. ¹⁷ La'tu' naca guió'j loru' idútè le naca cázaru', ¿nacxi gaca yóniru'? La'tu' naca nágaru' idútè, ¿nacxi gaca ilé'e zxína'ru'? ¹⁸ Na'a, Dios nucu'è yúgu'tè le nagudi' dzágalenru' ca gú'uni quézinè' Lè'. ¹⁹ La'tu' naca tuz le nagudi' dzágalenru', bíti'rö soa idú ca naca cázaru'. ²⁰ Na'a, ca nácaru', zían le nagudi' dzágalenru', pero tuz le nácaru'.

²¹ Que lè ni na', guió'j loru' biti' gaca guíè ná'aru', inná: “Biti' riquinda' li'.” Lësca' caní, ícjaru' biti' gaca guíè ní'aru', inná: “Biti' riquinda' libí'ili'.” ²² Na'a, yugu' le nagudi' dzágalenru', lè na' réquiru' nácagacarö cuídi'sö, lè ni naquíniröru'. ²³ Lësca' caní, yugu' le nagudi' dzágalenru', le réquiru' nácagacarö cá'asö, lè ni rugácuröru' dxi'a, en

yugu' le réquiru' biti' ral-la' ilá' lahui, rugácuröru' ca' dxi'a. ²⁴ Biti' run bayudxi gunru' caní que le nácarö lachi que le néquiniru'. Dios benë' idútë le naca cázaru', en benë' ga nácarö lesaca' lë na' réquiru' rë'u nácarö cá'asö. ²⁵ Caní benë', ate' biti' narúajgaca choplö le nagudi' dzágalenru', tu' tun chi'i luzé'eguequi tu ia'tú. ²⁶ Channö gaca zi' tu le néquiniru', ilaca zi' tsözxón len le yúgu'të le néquiniru' na', en channö tu le néquiniru' zoa bi ruzí' xibé, yúgu'të le nagudi' dzágalenru' tu'zí xibé tsözxón le.

²⁷ Na'a, libí'i cázali' dzágali' idútë le naca cazë' Cristo, ate' tu tuli' nácali' ca yugu' le nagudi' dzágalenë'. ²⁸ Lësca' caní, ladaj bönachi queë' Cristo, Dios nucu'ë nupa tun xichinë'.

Ga naca lo nucu'ë yugu' bönni' gubáz queë' Cristo.

Ga naca buropi nucu'ë yugu' bönni' tu'ë didza' uláz queë'.

Ga bunni nucu'ë yugu' bönni' tu'sédinë' luzá'aru'.

Ní'irö nucu'ë nupa tun yugu' yöl-la' huáca que yehua' yubá.

Ní'irö nucu'ë nupa tu'ún nupa te'e.

Ní'irö nucu'ë nupa tácalen böchi' luzá'aru'.

Ní'irö nucu'ë yugu' bönni' tu'luí'inë' rë'u dxin gunru'.

Ní'irö nucu'ë yugu' bönni' tu'ë didza' yúbölö biti' nazédagaquië'.

²⁹ Calëga yúgu'të' nácagaquië' gubáz queë' Cristo.

Calëga yúgu'të' tu'ë didza' uláz queë' Dios.

Calëga yúgu'të' tu'sédinë' luzá'aru'.

Calëga yúgu'të' tunë' yugu' yöl-la' huáca que yehua' yubá.

³⁰ Calëga yúgu'të' dë lu ná'agaquië' ulu'únë' nupa te'e.

Calëga yúgu'të' tu'ë didza' yúbölö biti' nazédagaquië'.

Calëga yúgu'të' tu'dödë' didza' yúbölö biti' nazédagaquië'.

³¹ Guli'güí' ládxi'li' cu'ë Dios lu ná'ali' yugu' yöl-la' huáca na' nácagacarö lesaca'. Na'a, ulu'ida' libí'ili' tu le nácarö lesaca' ca yúgu'të lë ni.

Yöl-la' nadxí'i

13 ¹ Sal-la' gaca gu'a xtídza'gaca bönachi le cabí nazëda', enca' xtídza'gaquië' gubáz lá'ayi queë' Dios, pero channö cabí nadxí'ida' luzá'a, didza' gu'a biti' gácarö lesaca' ca bö le run gui rucódxiru' o guíë rutíl-laru' luzé'e. ² Sal-la' nazí' lu na'a gu'a didza' uláz queë' Dios en tséajni'ida' yúgu'të le nagachi', en yúgu'të didza' réajni'i, en sal-la' naca idú ca réajlë'a Dios ga ridxintë huáca cúa' yugu' guí'a, pero channö cabí nadxí'ida' luzá'a, biti' bi nazáca'a. ³ Sal-la' quísia' idútë le dë quia' para ugahua' yugu' bönachi yechi', en sal-la' udöda' idútë le naca' ga ulu'zegui bönachi le tu' réajlë'a Cristo, pero channö cabí nadxí'ida' luzá'a, biti' ca' uzi'a xibé lë na' runa'.

⁴ Nu bönni' nadxí'inë' luzé'ë, ribözë' zxön ladxi'.

Náquië' dxi'i ladxi', en biti' ruzxé'enë' luzé'ë.

Nadxí'inë' luzé'ë idú ládxë'ë.

Biti' run ba zxön cuinë', en biti' run cuinë' lo.

⁵ Biti' runë' le ruá' dö'.

Biti' rudúli'në' le dë queë'.

Biti' rilétenë', en biti' röjnenë' dö' guluí'i bönachi queë'.

⁶ Biti' ca' rudzéjanë' cate' nu run le ruá' dö'.

Rudzéjanë' cate' nu run le naca idútë li.

⁷ Ruá' rilenë' bíti'tës bi gun luzé'ë queë'.

Réajlë'tica'së' luzé'ë.

Rúntica'së' löza gun luzé'ë le naca dxi'a.

Ribózatica'së' zxön ladxi'.

⁸ Bíti'rö tödi que yöl-la' nadxí'i. Huadödi que le dë lu ná'agaca bönachi iluí'i didza' uláz queë' Dios. Huadxín dza cate' bíti'rö gata' lu ná'agaca bönachi iluí'i didza' yúbölö le cabí nazédagaca, ate' huadödi que yöl-la' réajni'i quéguequi bönachi. ⁹ Láti'do'os réajni'iru' na'a, en láti'do'os ca' ruí'iru' didza' uláz queë' Dios. ¹⁰ Cate' idxín le naca idú, ní'irö údxi que lë na' naca láti'do'os.

¹¹ Cate' ni' naca' bí'ido', bë'a didza' ca bí'ido', en gulequi icja' ca bí'ido', en guzá' ládxa'a ca bí'ido'. Cate' bigula' bucá'ana' le nequi que bí'ida'ahua'. ¹² Na'a le rilé'eru' naca ca le rilé'eru' cate' ruyú cuinru' tu lu guié dxílido'. Biti' rilé'eru' idú ca naca. Dza ní'irö ilé'eru' idú ca naca yúgu'të. Na'a núnbë'a láti'do'os. Dza ní'irö gúnbë'a yúgu'të ca na' Dios caz núnbë'ë neda'. ¹³ Na'a, nacuá'tica'sö yöl-la' réajlë' queéru' Dios, en yöl-la' run löza queéru' Dios, en yöl-la' nadxí'i queéru' luzá'aru'. Nacuá' yonna ni, pero le naca lo naca yöl-la' nadxí'i.

Yugu' yöl-la' huáca runnë' queéru' Dios Bö' Lá'ayi

14 ¹ Guli'gún bayudxi idxí'ili' luzá'ali', en guli'güí' ládxi'li' sí'ili' ca' yugu' yöl-la' huáca runnë' queéru' Dios Bö' Lá'ayi, en le naca lo, yöl-la' huáca güí'ili' didza' uláz queë' Dios. ² Nu ruí'i didza' yúbölö le cabí nazëda, calëga bönachi ruí'ilen didza' nu na'. Dios caz ruí'ilen didza' nu na', tu' cuntú nu zoa réajni'i didza' ruí'i nu na'. Dios Bö' Lá'ayi ru'ë nu na' lataj ruí'i didza' ca nácagaca le nagachi' queë' Dios. ³ Nu na' ruí'i didza' uláz queë' Dios, ruí'ilen bönachi didza' para gácarö idú ca ta'yéajlë' Cristo. Rutipa ládxi'guequi, en ruhué tsahui' léguequi. ⁴ Nu na' ruí'i didza' yúbölö le cabí nazëda run tsutsu la' cuinsi, pero nu ruí'i didza' uláz queë' Dios run tsutsu yúgu'të bönachi queë' Cristo.

⁵ Raca ládxa'a güí'ili' didza' yúbölö le cabí nazédali' yúgu'tëli', pero le naca lo, ré'ënda' güí'ili' didza' uláz queë' Dios. Ruzí'iröru' xibé nu ruí'i didza' uláz queë' Dios ca ruzí'iru' xibé nu ruí'i didza' yúbölö le cabí nazëda, channö cabí zoa nu udödi didza' yúbölö na' le cabí nazëda, para ilaca tsutsu bönachi queë' Cristo. ⁶ Que lë ni na', böchi' luzá'ado', cate'

guída' ga zóali', channö güí'ilena' libí'ili' didza' yúbölö le cabí nazëda', bití' bi uzí'ili' xibé. Uzí'isili' xibé didza' na' güí'ilena' libí'ili' le nuluí'inë Dios neda', o didza' uzéajni'i rë'u, o didza' gu'a uláz queë' Dios, o le naca xibá queë'.

⁷ Lësca' caní raca que le ta'gú'u bö, yugu' le cabí nabángaca, ca naca gui rucódxiru', o ca naca guitarra. Channö cabí tul-la ca ral-la' ilún, ñnacxi caz gúnbë'ëru' bízxilö le tul-la na', lë na' rul-la gui na', o guitarra na'? ⁸ Channö cabí cödxí ca ral-la' gun lúzuba' böa' na' ulidza rë'u lu gudil-la, ñnuzxi caz upá' cuini para tseaj lu gudil-la na'? ⁹ Lësca' caní raca queéli'. Channö len lúdxí'li' güí'ili' didza' le cabí taca bönachi, bití' ca' ila'yéajni'i didza' güí'ili'. Caní gaca, nítisö güí'ili' didza'. ¹⁰ Le nácatë nacuá' zían didza' yúbölö tuí' zían cö' bönachi izá'a lu yödzölió ni, ate' nacuá' bönachi ta'yéajni'i tu tu didza' na'. ¹¹ Na'a, channö cabí réajni'ida' didza' ru'ë tu bönni', gaca' ca tu bönni' zi'tu' lahuë bönni' na' ru'ë didza', ate' bönni' na' ru'ë didza' gáquië' ca' lahua' neda' ca tu bönni' zi'tu'. ¹² Lësca' caní naca queéli'. Ruí'ida' lúdxí'li' sí'ili' yugu' le runnë' queëru' Dios Bö' Lá'ayi. Que lë ni na', guli'güí' lúdxí'li' sí'ili' le ilún ga ilácarö tsutsu bönachi queë' Cristo.

¹³ Que lë ni na' ca', nu ruí' didza' yúbölö le cabí nazëda ral-la' ulidza Dios, en inabi Lë' gunnë' que yöl-la' huáca quixjö' le ré'ëni inná didza' na' ruí' nu na'. ¹⁴ Cate' rulidza'-në' Dios, channö ruá'a didza' yúbölö le cabí nazëda', lu bö' naca caza' rulidza'-në' Dios, pero tu' cabí réajni'ida' didza' ruá'a, lu yöl-la' réajni'i quia' bití' ruzi'a xibé didza' na' ruá'a.

¹⁵ ¿Nacxi caz ral-la' guna' channö? Ulidza'-në' Dios lu bö' naca caza', enca' lu yöl-la' réajni'i quia' ulidza'-në' Dios. Gul-la' yöl-la' ba lu bö' naca caza', enca' lu yöl-la' réajni'i quia' gul-la' yöl-la' ba. ¹⁶ Channö lu bö' naca cazu' rulidza lá'ayu'-në' Dios, ate' zoa ni' nu riyónisö, channö cabí réajni'i didza' ru'u, ñnacxi caz gaca inná: “Ca' gaca”, ni'a que didza' ru'u, rë'u-në' Dios: “Xclenu”? ¹⁷ Nadxi ca' dxí'ado' ru'u didza', rë'u-në' Dios: “Xclenu'.” Channö cabí réajni'i didza' ru'u, bití' bi uzí' xibé nu na' riyöni. ¹⁸ Rea'-në' Dios: “Xclenu’”, tu' ruí'ira' didza' yúbölö le cabí nazëda' ca yúgu'tëli'. ¹⁹ Lógaca bönachi queë' Dios gué'ënitë'röda' gu'a gáyu'sö didza' le gaca ila'yéajni'i bönachi ca zían gayuá' didza' yúbölö le cabí nazëda', ate' cuntú nu gaca tséajni'i. Gaca usédida' ia'zíca'rö bönachi tuzi channö ila'yéajni'i didza' gu'a.

²⁰ Böchi' luzá'ado', bití' gácali' ca bí'ido' ca naca le rizá' lúdxí'li'. Guli'gaca ca bí'ido' para cabí gunli' le ruá' dö', pero guli'gaca bönni' chinácagaca ca naca le rizá' lúdxí'li'. ²¹ Nazúaj lu guichi lá'ayi le rnna: “Len didza' yúbölö, en lu ruá'agaca bönachi izá'a güí'ilena' bönachi ni didza'. Sal-la' guna' caní, bití' ulu'zé nágagaca xtídza'a.” ¡Caní rnnë' Xanru'! ²² Caní naca, Dios ru'ë rë'u lataj ruí'iru' didza' yúbölö le cabí nazëdaru' para gaca tu le naca bë' lógaca bönachi bití' ta'yéajlë', en calëga lógaca nupa ta'yéajlë' Cristo. Ru'ë rë'u lataj ruí'iru' didza' uláz

queë' Lë' le ulu'zí' xibé nupa ta'yéajlë' Cristo, en calëga bönachi na' biti' ta'yéajlë'. ²³ Que lë ni na', cate' udúbili' tsözxón, yúgu'tëli' na' néquili' queë' Cristo, channö güí'ili' didza' yúbölö le cabí nazédali' yúgu'tëli', ate' tsázagaca nupa nazédagaca láti'do'os, o nupa biti' ta'yéajlë' Cristo, ñnaru' cabí ila'nná: “Nachixi ícjali’”? ²⁴ Na'a, channö yúgu'tëli' güí'ili' didza' uláz queë' Dios, ate' tsaz nu cabí réajlë' Cristo o nu nazëda láti'do'os, guéquibe'e nu na' nabaga' xíguia', ate' Dios uchi'a usöröë' lë'. Caní guéquibe'e nu na', tu' tseajni'i didza' güí'ili' yúgu'tëli'. ²⁵ Guéquibe'e ca naca le rizá' ladxi' nu na', lë na' bigachi', ate' uzóa zxibi nu na', en tseaj ladxi' Dios, ate' inná: “Le nácatë Dios zóalenë' libí'ili'.”

Ca ral-la' gunru' ga rudúbiru' queë' Cristo

²⁶ Que lë ni na', böchi' luzá'ado', cate' rudúbili' queë' Cristo, rul-lë' tuë' bönni' dzáguie' libí'ili' tu salmo, ate' rusédinë' ia'túë' tu xibá, ate' ia'túë' riguixjöi'inë' libí'ili' tu le buluí'inë' Dios lë', ate' ia'túë' ru'ë didza' yúbölö le cabí nazëdë', ate' ia'túë' rudödë' didza' yúbölö na' le cabí nazëdë'. Yúgu'të le gunli' ral-la' gaca le ulu'zí' xibé nupa tu'dubi queë' Cristo. ²⁷ Cate' nacuá' ni' nupa tuí'i didza' yúbölö le cabí nazédagaca, biti' ral-la' güí'ili' didza' caní zíanrö ca chopá tsónnasili'. Huáca gu'ë didza' tuzë' bönni' na', ate' tödi na' huáca gu'ë didza' ia'túë', pero run bayudxi soa nu udödi didza' yúbölö na' le biti' nazédali'. ²⁸ Channö cuntú nu zoa nu gaca udödi didza' yúbölö na' le cabí nazédali', nu na' ruí'i didza' yúbölö le cabí nazëda ral-la' soa dxisö ga na' nudúbili', ate' huáca güí'ilen Dios didza' na' lu icja ládxi'da'ahui. ²⁹ Lësca' caní, yugu' bönni' tu'ë didza' uláz queë' Dios ral-la' ilu'ë didza' chopá tsónnasë', ate' ia'zica'rë' bönni' na' tu'ë didza' uláz queë' Dios ral-la' ulu'chi'a ulu'söröë' didza' ru'ë bönni' na'. ³⁰ Channö Dios uluí'inë' tu bönni' rö'ë ni' le ré'ëni inná xtídzë'ë, ral-la' soa dxisö nu na' ruí'i didza'. ³¹ Yúgu'tëli' huáca güí'ili' didza' uláz queë' Dios tu tuli' para izédali' yúgu'tëli', en idipa ládxi'li' ca' yúgu'tëli'. ³² Yugu' bönni' tu'ë didza' uláz queë' Dios huáca ila'nná be'e cúngaquie', en ila'cu'ë dxisö. ³³ Calëga Dios nu run ga rutsátsaru', tu' ré'ënë' Lë' gácaru' ba'a ladxi', ca na' runë' ga nacuá' yúgu'të cö' bönachi queë' Cristo.

³⁴ Ral-la' ila'cuá'anú dxisö nigula queë'li' ga na' rudúbiru'. Biti' dë lu ná'agacanu iluí'inu didza' ni'. Ral-la' ila'cuá'anú nōxaj ca na' rinná bē' xibá queë' Dios. ³⁵ Channö té'ëninu ila'yéajni'inu ia'lati', ral-la' ila'nábinu bönni' que queégacanu cate' ni' nacu'ë lídxigaquie'. Biti' ral-la' iluí'inu didza' yugu' nigula ga na' rudúbiru' queë' Dios.

³⁶ ¿Naru' réquitseli' bunödzjé' Dios xtídzë'ë lu ruá'ali' libí'isili'? ¿Naru' réquitseli' bidxín xtídzë'ë Dios queézili' libí'ili'? ³⁷ Channö nu bönni' nútsë'ë ladjali' réquinë' ru'ë didza' uláz queë' Dios, o réquinë' zóalenë' Dios Bö' Lá'ayi lë', bönni' ni ral-la' si' lu nē'ë naca xibá queë'

Xanru' le ruzúaja' queé'li' lu guichi ni. ³⁸ Na'a, channö cabí ruí'i ládxë'ë didza' ni, bití' güí'i ládxi'li'-në' bönni' na'.

³⁹ Que læ ni na', böchi' luzá'ado', guli'güí' ládxi'li' güí'ili' didza' uláz queë' Dios, en bití' inná bé'eli' nu ruí'i didza' yúbölö le cabí nazëda.

⁴⁰ Ral-la' gunru' yúgu'të ca sa'yéaj, en lu yöl-la' ba'a ladxi'.

Bubanë' Cristo lu yöl-la' guti

15 ¹ Na'a, böchi' luzá'ado', riguíxjöi'ida' libí'ili' ca naca didza' dxi'a na' bena' libán que ga zóali', læ na' guzxí' lu ná'ali', ate' run ga nácarö idú ca réajlë'ëli' Cristo. ² Ni'a que didza' ni uláli', channö gunli' ca rnna didza' dxi'a na' bena' libán que ga zóali', channö le nácatë guyéajlë'ëli'-në' Cristo.

³ Ga gusí lo budöda' lu ná'ali' le budödë' Dios lu na'a neda'. Caní rnna: “Gútië' Cristo uláz queéru' tu' nabága'ru' dul-la'.” Ca naca læ ni nazúaj lu guichi lá'ayi le rnna ben bayudxi benë'. ⁴ Rnna ca': “Bigachë'ë yeru ba, en cate' bizá'a tsonna dza, bubanë' lu yöl-la' guti”, ca na' nazúaj ca' lu guichi lá'ayi le rnna ben bayudxi guca queë'. ⁵ Gudödi ni' buluí'i lahuë' Cristo, ate' bilé'enë' Pedro Lë', en gudödi ni' idxínnutë' gubáz queë' bila'lé'enë' Lë'. ⁶ Ní'irö buluí'i lahuë' lógaquië' zíanrö ca gayu' gáyu'ë böchi' luzá'aru' ta'yéajlë'ë Cristo, cate' ni' nudúbigaquië' tsözxón. La'tu'biqui' yúgu'të' böchi'ru' ni nacu'ë nabángaqüië' na'a, sal-la' bal-lë' chinátigaquië'. ⁷ Ní'irö Jacobo bilé'enë' Lë', en gudödi ni' buluí'i lahuë' lógaquië' yúgu'të bönni' gubáz queë'.

⁸ Ga yöjsetë buluí'i lahuë' ca' lahua' neda'. Ca guca læ ni, naca' ca tu bí'ido' gúljabí' cate' chigudödi dza ral-la' gáljabí'. ⁹ Caní naca, tu' nácara' neda' cá'asö ca yúgu'të bönni' gubáz queë', en bití' naca' neda' lesaca' si' la' gubáz queë', tu' gudxía ládxa'a bönachi queë' Dios. ¹⁰ Na'a, tu' buzá' ládxë'ë quia' Dios naca' le naca' na'a, en calëga nítisö buzá' ládxë'ë quia'. Béntëra' neda' xichinë' ca ia'zíca'rë' gubáz queë', sal-la' calëga rácasö quia' bena' dxin na'. Dios caz, lu yöl-la' ruzá' ladxi' queë', bugunë' neda' dxin. ¹¹ Na'a, channö bena' libán neda' o channö gulunë' libán ia'zíca'rë' bönni', læ ni le runtu' libán que, en le guyéajlë'ëli' libí'ili'.

Ubanru' lu yöl-la' guti

¹² Runtu' libán queë' Cristo ca na' bubanë' lu yöl-la' guti. Channö caní naca, ñnacxi caz naca, rnnali' bál-lali': “Bití' ulu'bán nupa chinátigaca”?

¹³ La'tu' cabí ulu'bán nupa chinátigaca, bití' bubanë' Cristo, ¹⁴ en la'tu' cabí bubanë' Cristo, nítisö naca le bentu' libán que, en nítisö naca yöl-la' réajlë' queé'li' Lë'. ¹⁵ Ia'stú, la'tu' cabí bubanë' Cristo, rizí' yé'ëtu' cate' runtu' ba nalí queë' Dios, rnnatu' busubanë' Cristo, ate' la'tu' cabí usubanë' nupa chinátigaca, Dios bití' busubanë' Cristo. ¹⁶ La'tu' cabí ulu'bán nupa chinátigaca, bití' bubanë' Cristo, ¹⁷ en la'tu' cabí bubanë'

Cristo, nítisö naca yöl-la' réajlë' queéli' Lë', ate' nagá'anagaca dul-la' nabága'li'. ¹⁸ Lësca' caní, nupa na' chinátigaca, en gula'yéajlë' Cristo, tsaz gulati channö cabí bubanë' Lë'. ¹⁹ Channö tsánnisö ni zóaru' nabanru' huáca uzí'iru' xibé' Cristo, nácaröru' bayechi' ca yúgu'të bönachi.

²⁰ Na'a, le nácatë bubanë' Cristo lu yöl-la' guti, en náquië' nu gusí lo bubán tsaz ladaj yúgu'të nupa ulu'bán tsaz lu yöl-la' guti. ²¹ Ca na' guyú'u yöl-la' guti ni'a que le benë' tuë' bönni', lësca' caní, ni'a que le benë' ia'túë' bönni' guyú'u yöl-la' rubán quégaca nupa chinátigaca. ²² Ca na' tati yúgu'të bönachi tu' náljlengaca Adán, lësca' caní ulu'bán yúgu'të nupa na' náljlengaca Cristo. ²³ Tu tuë' ubanë' ca ral-la' gaca. Zí'alö bubanë' Cristo, ate' tödi ni ulu'bán nupa néquiguequi queë' Cristo cate' huödë'. ²⁴ Ní'irö idxín dza údxi cate' ugúë' Cristo idútë le dë lu në'e, en idútë yöl-la' unná bë', en idútë yöl-la' huáca que tu' xihui', ate' udödë' yöl-la' unná bë' queë' lu në'ë Dios Xuz. ²⁵ Run bayudxi inná bë'ë Cristo ga idxinrö dza chibenë' Dios ga ulu'zechu zxíbigaca lahuë' Lë' yúgu'të nupa ta'dá'baga' Lë'. ²⁶ Le ridá'baga' Lë' le usunítië' ga údxi naca yöl-la' guti. ²⁷ Dios chinudödë' yúgu'të lu në'ë Zxí'inë' para inná bé'enë' le. Nazúaj lu guichi lá'ayi, rnna: “Budödë' yúgu'të lu në'ë para inná bé'enë' le.” Na'a, naca bë' biti' budödi cuinë' lu në'ë Zxí'inë', tu' naca cazë' Lë' Nu rudödi yúgu'të lu në'ë Zxí'inë'. ²⁸ Cate' idxín dza ni' chinudödë' Dios lu në'ë Cristo yúgu'të para inná bé'enë' le, ní'irö Lë' cazë' Zxí'inë' udödi cuinë' lu në'ë Dios, Nu na' budödi lu në'ë Zxí'inë' yúgu'të, ate' ga údxi, Dios inná bé'enë' tsaz yúgu'të.

²⁹ Bál-lali' ridílali' nisa uláz quégaca nupa chinátigaca. Channö réquili' biti' ulu'bán nupa na' chinátigaca, ¿bizx que ridílali' nisa uláz quégaca nupa chinátigaca?

³⁰ Zoa bönadxi queétu' gátitu' yúgu'të dza. ¿Bizx que ruí'itu' lataj gaca caní channö cabí ubanru' lu yöl-la' guti? ³¹ Yúgu'të dza zoa bönadxi gátia'. Riguíxjöi'ida' libí'ili' lë ni, böchi' luzá'ado', tu' raza ládxa'a le bena'. Caní naca tu' bena' ga réajlë'ëli' Xanru' Jesucristo. ³² Channö tu' gú'unisida' gudíl-lalena' böa' guixi' sínia' lu yödzo Éfeso, ¿bizxi caz uzi'a xibé? Channö cabí ulu'bán nupa chinátigaca, ral-la' gunru' ca ta'nná bönachi: “Gui'aj gáguru' tu' huátiru' cuxó huidzaj.”

³³ Biti' güí'ili' lataj nu si' ye'e libí'ili'. Channö si' lu ná'ali' láti'do'os le cabí nácatë, idútëli' huóacali' chul-la niti. ³⁴ Buli'bí'i ládxi'li', en biti' gunli' dul-la' tu' cabí núnbë'ëli'-në' Dios bál-lali' libí'ili'. Rnnía' caní para guna' ga utuí'ili'.

Ca ilaca nupa ulu'bán lu yöl-la' guti

³⁵ Nadxi ca' zoa nu inná: “¿Nacxi ulu'bán nupa chinátigaca? ¿Nacxi gaca idú ca nácgaca cazë' cate' ulu'dxinë'?” ³⁶ Li', bönni' biti' bi nózinë'. Lë na' rázu' luyú biti' ilén channö cabí initi. ³⁷ Lë na' rázu' luyú

naca tu xisédo'os, nadxi ca' que zxoa' xtila o que ia'tú guixi' cuando'. Lë na' rázu' biti' naca guixi' cuando' na' ral-la' ilén. ³⁸ Dios runë' ga gaca guixi' cuando' ca nun cazë' que. Ca naca tu tu xisedo' na' runë' ga gaca guixi' cuando' que. ³⁹ Lësca' caní, biti' naca lébisö bëla' que queégacaba' yúgu'tëba' böa' guixi'. Zoa tu bëla' quégaca bönachi, en ia'tú ca naca bëla' quégacaba' böa' guixi'. Ia'tú ca naca bëla' quégacaba' biguinni, en ia'tú ca naca bëla' quégacaba' böla. ⁴⁰ Lësca' caní nadzá' idú ca nácagaca caz nupa nacué' yehua' yubá ca naca idú ca nácagaca caz nupa nacué' luyú ni. Zoa tu yöl-la' lachi quégaca nupa nacué' yehua' yubá, en ia'tú ca naca yöl-la' lachi quégaca nupa nacué' luyú ni. ⁴¹ Zoa tu yöl-la' lachi que gubidza, en ia'tú que beo', en ia'tú quéguequi bölj lúzxiba. Yöl-la' lachi que tu bölj lúzxiba nadzá' ca naca yöl-la' lachi que ia'tú bölj lúzxiba. ⁴² Lësca' caní gaca cate' ulu'bán nupa chinátigaca. Cate' rigachi' lu yeru ba naca tu bëla' initi. Cate' ubán, ní'irö gaca tu le soa tsaz. ⁴³ Cate' rigachi' lu yeru ba naca tu bëla' cá'asö, en le nacuidi'. Cate' ubán, ní'irö gaca tu le lachi, en le nál-la. ⁴⁴ Cate' rigachi' lu yeru ba naca tu bëla' que yödzölió ni. Cate' ubán, ní'irö gaca tu le soa tsaz yehua' yubá. Zoa tu bëla' que yödzölió ni, en ia'tú ca gaca le idzaga bö' naca cázaru'.

⁴⁵ Nazúaj lu guichi lá'ayi le rnna: “Bönni' na' gusí lahuë' zoë' luyú ni, lë' Adán, Dios benë' lë' bönni' ban”, pero Bönni' na' guyázië' xilatjë' Adán, Lë' Cristo, Dios benë' ga náquië' Bö' nabániru'. ⁴⁶ Biti' blë'ë zí'alö Bönni' na' náquië' Bö'. Bla' zí'alö nu na' naca bönáchisö, ate' ní'irö blë'ë Bönni' na' náquië' Bö'. ⁴⁷ Bönni' ni' blë'ë zí'alö, gúquinë' yu. Bönni' na' blë'ë burópilö, Nu na' naca Xanru', birúajë' yehua' yubá. ⁴⁸ Nupa nacué' luyú ni nácagaca ca gúquië' bönni' na' gúquinë' yu, ate' nupa ral-la' tsöjcuá' yehua' yubá ilaca ca naca Nu na' birúaj yehua' yubá. ⁴⁹ Ca na' na'a dë queëru' tu bëla' le naca ca guca bëla' queë' bönni' na' gúquinë' yu, lësca' ral-la' huöéquiru' ca néquinë' Nu na' birúaj yehua' yubá.

⁵⁰ Caní ré'ëni inná lë ni rea' libí'ili', böchi' luzá'ado', rnnía': Le néquini bëla', en rön biti' gaca tsaz ga ni' rinná bë'ë Dios, en lësca' caní, lë na' initi biti' gaca ideli' lë na' soa tsaz. ⁵¹ Buli'yútsöca', rea' libí'ili' tu le bigachi': Biti' gátiru' yúgu'tëru', pero Dios utsé'ë ca nácaru' yúgu'tëru'. ⁵² Tsárido'os gaca, tsca naca tu le rutásö guió'j loru', cate' cödxí lúzuba' böa' le røjsetë. Cödxí lúzuba' na', ate' ulu'bán nupa chinátigaca, en iléquini tu le soa tsaz, ate' Dios utsé'ë le néquiniru' yúgu'tëru'. ⁵³ Lë na' nácaru' le riniti ral-la' huóaca le soa tsaz, ate' le néquiniru', lë na' ral-la' gati, huóaca tu le catu caz gati. ⁵⁴ Cate' lë na' riniti chinuhuóaca le soa tsaz, enca' lë na' ral-la' gati chinuhuóaca le catu caz gati, ní'irö idxín lë na' nazúaj lu guichi lá'ayi, le rnna:

Nadúa tsaz yöl-la' guti.

Chibidéli'në' Cristo.

⁵⁵ Bítirö inná be'e yöl-la' guti rë'u.

Bíti'rö gaca yöl-la' guti bi gun queéru'.

⁵⁶ Huáca bi gun yöl-la' guti queéru' tu' nabága'ru' dul-la', ate' nabága'ru' dul-la' tu' ridá'baga'ru' xibá queë' Dios. ⁵⁷ iXclenë' Dios! iLë cazë' runë' ga nuláru' lu yöl-la' guti ni'a que le benë' Xanru' Jesucristo!

⁵⁸ Que lë ni na', böchi' luzá'ado', guli'sóa tsutsu. Guli'gaca idú ládxi'li', gúntica'sili' xichinë' Xanru' tu' nöz quézili' biti' runli' nítisö xichinë' Xanru'.

Yugu' bönachi Corinto tu'nödzaj quégaquië' böchi'gaca ta'yádzjanë'

16 ¹ Na'a, ca naca que dumí na' unódzjali', le gácalen böchi'ru' ta'yéajlë'ë Cristo nacu'ë Jerusalén, guli'gún na'a ca na' gunná bé'eda' yugu' cö' bönachi queë' Cristo, nacuá' luyú Galacia. ² Yugu' dza domingo, tu tuli' ral-la' cú'uli' quez lati' dumí, tsca na' Dios runnë' queéli'. Guli'gún chi'i le, para cabí gun bayudxi bi utúbili' cate' idxina' ga zóali'. ³ Cate' ni' idxina' ga zóali', isól-la'a Jerusalén bönni' na' cöli' libí'ili'. Uzúaja' tu lu guichi le gun ga ilaca bé'gaquië', ate' ilu'ë dumí na' unódzjali'. ⁴ Channö ral-la' tseja' ca' neda', tsöjácálenë' neda'.

Le ré'ënë' gunë' Pablo

⁵ Guída' ga zóali' cate' údxi töda' yugu' yödzö luyú Macedonia, tu' run bayudxi töda' yugu' yödzö na'. ⁶ Réquida' ugá'analena' libí'ili' tu chi'i, o nadxi ca' ugá'ana' ni' yugu' beo' ziaga. Ní'irö huáca gácalenli' neda', ugú'uli' neda' nöza gátitës ga ral-la' tseja'. ⁷ Cate' guída' uduyúa' libí'ili' biti' ré'ënda' tódisa' ni'. Runa' löza sóalena' libí'ili' xidzé, channö gunnë' Xanru' neda' lataj. ⁸ Ugá'ana' ni lu yödzö Éfeso ga idxinrö dza Pentecostés ⁹ tu' dë lataj ni guna' tu dxin zxön queë' Xanru', sal-la' zían nupa ta'dá'baga' neda'.

¹⁰ Channö idxinbi' bi'i Timoteo ga na' zóali', guli'güi' ládxi'li'-bi', para cabí ubi uguí'ibi' tsanni ni' sóalenbi' libí'ili', tu' runbi' xichinë' Xanru' ca na' runa' neda' xichinë'. ¹¹ Que lë ni na', cuntu nu ral-la' uzóa lëbi' tsölá'alö. Guli'gácalen-bi', ugú'uli'-bi' nöza idú tsáhui'do', para udxinbi' ga ni zoa' neda', tu' riböza'-bi' lëbi', enca' yugu' böchi'ru' túnlenë'-bi' tsözxón dxin.

¹² Ca naca queë' böchi'ru' Apolos, gúta'yua' lahuë' tsejë' tsöjyúë' libí'ili' tsözxón len yugu' böchi'ru', pero biti' ré'ënë' tsejë' na'a. Guidé' cate' séqui'në'.

Didza' ru'ë Pablo ga ruúdx

¹³ Buli'subán ládxi'li', en guli'gaca tsutsu ca réajlë'ëli'-në' Cristo. Guli'gaca rugu ládxi', en buli'tipa ládxi'li'. ¹⁴ Len yöl-la' nadxí'i guli'gún bíti'tës bi gunli'.

¹⁵ Na'a, böchi' luzá'ado', chinóz quézili' ca naca queë' Estéfanos, enca' quégaca di'a dza queë'. Nácagaca nupa gula'sí lógaca ta'yéajlë' Cristo

ladaj bönachi nacuá' luyú Acaya. Bulu'dödi cúngaquië' para ilunë' xichíngaca bönachi queë' Dios. ¹⁶ Ráta'yua' loli', böchi' luzá'ado', gunli' bal nupa nácgaca ca bóchi'ru' na', enca' ca nácgaca nupa tunlen légaquië' tsözxón dxin, en tácalen légaquië'. ¹⁷ Rudzėjada' tu' bila'dxinë' Estéfanos, en Fortunato, en Acaico ga zoa', tu' gúcalengaquië' neda' uláz queé'li'. ¹⁸ Bulu'hué tsáhuë'ë neda' ca na' bulu'hué tsáhuë'ë ca' libí'ili'. Guli'gún bal bönachi caní.

¹⁹ Yugu' cö' bönachi queë' Dios luyú Asia ni tu'gapa Dios libí'ili'. Aquilo, en Priscila, enca' nupa tu'dubi queë' Dios ga naca lu yu'u lídxigaquië' tu'gapë' Dios libí'ili'. ²⁰ Yúgu'të bóchi'ru' ni tu'gapë' Dios libí'ili'. Guli'gapa Dios tuli' ia'tuli', en unída'li' luzá'ali'.

²¹ Neda', Pablo, len na' cuin caza' ruzúaja' lu guichi lë ni, rnnía': Rugapa' Dios libí'ili'.

²² Nu biti' nadxí'i Xanru' Jesucristo, chinabía dö' nu na'. Gudá Xanru'.

²³ Rinábida'-në' Xanru' Jesucristo uzá' ládxë'ë queé'li'. ²⁴ Nadxí'ida' yúgu'tëli' tu' nácaru' tuz len Xanru' Jesucristo. ¡Ca' gaca!